

Okushwekuurwa

kw'Obusingye Mushanju bw'Ekanisa

Eshuura ya Kashatu

Obusingye Bw'Ekanisa Ya Efeso

Okwanjura Obusingye Bw'Ekanisa

Okwenda ngu oyetegyerereze kimwe obutumwa bw'Obusingye bw'Ekanisa niinyenda kushobooraho engyenderwaho ezitari zimwe ezimbaasiise kuhika aha kumanya amaziina g'entumwa, oburaingwa bw'obusingye, kandi n'ebindi ebiine akakwate nabwo.

Ahabw'okushangwa okwega oku kwabaire nikwija kuba okurikukirayo obukuru kukira okundi oku ndagizire kuhitsya obwire obu, nkasherura Ruhanga kumara ebiro bingi ngu ntungye okwebemberwa kw'Omwoyo Orikwera. Bwanyima nibwo naashomire Ebyahandiikirwe ebirikukwata aha Busingye bw'Ekanisa kandi naasheruririza omu byafaayo bingi by'ekanisa ebyahandiikirwe ab'ebyaafaayo abatarikugwera rubaju abu naabaasize kutunga. Ruhanga tarangire kugarukamu okushaba kwangye, ahabw'okuba ku naashomire Ekigambo n'ebyaafaayo, nkabaasibwa Omwoyo Orikwera kureeba eky'okureeberaho kishwekwirwe kirikuraba omu byasha by'emyaka kuhikira kimwe hati, ebiro by'aha muheru.

Ekishumuruzo eki naahairwe Mukama ekyatumire naabaasa kuhamya entumwa ahabwa buri busingye n'ekirikukirayo kuba eky'Ebyahandiikirwe. Omu bwijwire nikibaasa kwetwa ekishumuruzo Kikuru munonga omuri Baiburi. N'okushuuruurirwa ngu Ruhanga tahinduka, kandi emitwarize Ye tebaasa kuhinduka nk'oku Nawe Ari otahinduka. Omu kitabo ky'Abaheburaayo 13:8 nihagira hati,

“Yesu Kristo tahinduka; oku abaire ari nyomwabazyo, n'eriizooba nikwo ari, kandi nikwo ariguma ebiro byona.”

Omubuurizi 3:14-15

“Nimanya ngu, eki Ruhanga akora kyona kiriyagumaho ebiro byona; tihaine kirikubaasa kukyongyerwaho, nari okukituubyaho; kandi Ruhanga akakihanga atyo, ngu abantu Bamutiine.

Ekiriho kirabaireho; ekiribaho nakyo kirabaireho; kandi Ruhanga agaruraho ekyabaire kiihirweho.”

Reeba nkiki: Ruhanga otahinduka aine emitwarize etahinduka. Eki Yaakozire OMU KUTANDIKA naija kugumizamu naakikora okuhitsya obu kiraakorwe omurundi ogw'AHA MUHERU. Tiharibaho okuhinduka. Koresa ekyo aha Busingye bw'Ekanisa. Omuringo gw'omushaija ou Ruhanga yaatooraine ahabw'obusingye bw'okubanza, kandi n'oku Ruhanga yaayorekirwe omu buheereza bw'omushaija ogwo, kukaba nikwija kuba eky'okureeberaho aha bundi busingye bwona. Eki Ruhanga yaakozire omu busingye bw'ekanisa y'okubanza nikyo Arikwenda kukora omu busingye obundi bwona.

Hati nitumanya buzima omu Kigambo ekyahandiikirwe Omwoyo Orikwera oku ekanisa y'okubanza, nari shi eyaabandize, yaatandikire kandi n'oku Ruhanga Yaagyeyorekyeiremu. Ekigambo tikibaasa kuhinduka nari kuhindurwa ahabw'okuba Ekigambo ni Ruhanga. Yohaana 1:1, “Bwa mbere na mbere hakaba hariho Kigambo; Kigambo ogwo akaba atuura na Ruhanga; kandi Kigambo akaba ari Ruhanga.” Okuhinduraho ekigambo kimwe, nk'oku Haawa yaakozire, nikireeta ekibi n'okufa, nk'oku kirikugira omu Kushuuruurwa 22:18-19, “Omuntu weena ku aribyongyeraho, Ruhanga aryamwongyeraho ebibonaboneso ebihandiikirwe omu kitabo eki; kandi omuntu weena ku aricwa aha bigambo eby'omu kitabo ky'obunabi obu, Ruhanga aryamwaka omugabo gwe ogw'omu (Kitabo ky'Amagara) n'ogw'omu rurembo orurikwera, ebihandiikirwe omu kitabo eki.” N'ahabw'ekyo, oku ekanisa yaabaire eri ahari Pentekoote niyo ngyenderwaho. Ekyo nikyo ky'okureeberaho. Tihariho ky'okureeberaho ekindi. Abeegire n'obu baakugamba ki, Ruhanga TAKAHINDURAHOGA eky'okureeberaho ekyo. Eki Ruhanga yaakozire ahari Pentekoote nikyo Araiye kuguma naakora okuhitsya obu obusingye bw'ekanisa buraahweho.

N'obu abeegire barakugambire ngu obusingye bw'entumwa bukahwaho, otakiikiriza. Okugamba nk'oku kugwire ahabw'enshonga ibiri. Eky'okubanza kya byona, kigwire kukitwaramu ngu tihakiriho ezindi ntumwa, ngu ahabw'okuba ezaabandize ikumi na ibiri zikafa. Entumwa nikimanyisa “ogwo otumirwe”; kandi hariho baingi abatumirwe ebiro ebi, kwonka nibeetwa abamiishani. Obwire bwona obu abashaija barikwetwa kandi bakatumwa n'Ekigambo ky'Amagara nihaba hariho obusingye bw'entumwa oburikugumizamu. Ekya kabiri, nibagamba aha busingye obu “amaani g'Omwoyo Orikwera agoorekirwe” nk'obwahweire ahabw'okuba ebya Baiburi bihweireyo. Ago tigari mazima. Tihariho n'obu kyakuba Ekyahandiikirwe kimwe ekirikugamba kityo, kwonka baingi bahendera nibagamba okundi. Nkuku hanu okuhamya kwaitu okurikworeka ku enshoboorora ezi zombi zigwire. Ebyakozirwe 2:38-39. “Petero yaabagarukamu ati: Mweteise, mwena mubatizibwe omu Iziina rya Yesu Kristo, mubone kusaasirwa ebibi byanyu; kandi nimwija kuheebwa ekiconco ky'Omwoyo Orikwera. Ahakuba okuraganisibwa oku n'okwanyu n'okw'abaana baanyu, n'okwa boona abari hare, omuntu weena oryetwa Mukama Ruhanga waitu.” Okuraganisibwa amaani agu entumwa zaahairwe aha izooba rya Pentekoote “n'okwanyu

(Abayudaaya), n'abaana baanyu (Abayudaaya), n'okwa boona abari hare (Abanyamahanga), omuntu weena oryetwa Mukama Ruhanga waitu (Abayudaaya n'Abanyamahanga).” Okuhitsya obu Arireka kweta, obutumwa bwa Pentekoote n'amaani TIBIRIHWAHO.

Eki ekanisa yaabaire eine ahari Pentekoote n'obugabe bwayo obutarikubaasa kugiihwaho. Omu kutandika, ekaba eine Ekigambo kya Ruhanga ekishemeire. Ekaba eine amaani g'Omwoyo agaayorekirwe omu bumanyiso obutari bumwe n'eby'okutangaaza kandi n'ebiconco by'Omwoyo Orikwera. Abaheburaayo 2:1-4, “Nikyo tushemerereire kuta omutima aha bi twahuriire, ngu tutahaba tukabirugaho. Mbweni Ekigambo ekyagambirwe baamaraika, ku kiraabe kyahamire, kandi n'okushiisha kwona n'okutahirira kwona (aha Kigambo) ku biraabe byahairwe ekifubiro ekibishemereire, itwe turyakira tuta, ku turiba tuteetaire aha kujunwa okukuru okurikwingana kuti? Okujunwa okwo kukabanza kugambwa Mukama, twakuhimizibwa Abaamuhuriire; kandi na Ruhanga yaakuhama n'obumanyiso n'eby'okutangaaza n'eby'amahano by'emiringo mingi n'ebiconco by'Omwoyo Orikwera, ebi Ruhanga yaagabire nk'oku yaasiimire.” Egyo kanisa eyaabandize teratairweho bantu. Ekaba neeyebemberwa Omwoyo Orikwera. Ekaba etari mpango munonga. Ekangwa kandi yaagaywa. Ekabonabonesibwa. Ekahiigwa kuhika omu kufa. Kwonka ekaguma eri ey'amazima ahari Ruhanga. Ekaguma n'entwaza y'Ekigambo ekyabandize.

Hati otahabisibwa hanu. Ku ndaagambe nti Ruhanga n'emihanda Ye tibihinduka, nimba ntaagira ngu ekanisa n'entumwa zaayo tibibaasa kuhinduka. Ekanisa ti Ruhanga. N'ahabw'ekyo neebaasa kuhinduka. Kwonka eki naagamba kiri ngu ahabwa Ruhanga okutahinduka n'emihanda Ye etahinduka nitubaasa kugarukayo omu kutandika tureebe ekikorwa ky'okubanza kandi ekihikire kya Ruhanga reero tuwemu ahabw'egyo ngyenderwaho. Okwo nikwo kirikukorwa. Ekanisa y'Amazima neiya kuguma neegyezaho kuba nk'eyaabandize ahari Pentekoote. Ekanisa y'Amazima ey'ebiro ebi neiya kugyezaho kwenda kwingana n'eya ira eyaabandize. Kandi entumwa aha makanisa, ziine Omwoyo omwe wa Ruhanga omurizo, nizijia kugyezaho kwenda kwingana n'entumwa Paulo. Tiziribeera kimwe nkawe; kwonka entumwa z'amazima nizo zirikwija kuba haihi munonga na Paulo, owaabaire atari mbohe y'omuntu weena, ayeheereireyo kimwe ahari Ruhanga, kandi owaagambire Ekigambo kya Ruhanga kyonka, kandi akooreka Omwoyo Orikwera omu maani. Tihariho ndiijo ntumwa eyaakubaasize kukikora. Nooteekwa kukora orikwihirira aha kyabandize. Nk'oku ekintu kizaara ekirikukishusha, Ekanisa y'Amazima niyo erikwija kuguma neegyezaho kugyendera omu ntambo z'abaagitandikire ahari Pentekoote kandi n'entumwa zaayo nizijia kukurata entumwa Paulo, entumwa y'okubanza aha busingye bw'ekandisa y'okubanza. Kyanguhi kityo, kandi nikitangaaza kityo.

N'ekishumuruza eki, kyanguhi kityo, kandi kirikutangaaza, nkabaasa, ndikuhwerwa Omwoyo Orikwera, kushoma Ekitabo ky'Okushuuruurwa n'ebyaafayo ntyo naashangamu buri busingye, buri ntumwa, oburaingwa bwa buri busingye, kandi n'ekicweka eki buri emwe yaakozire omu kigyendererwa kya Ruhanga okuruga ahari Pentekoote kuhika aha muheru gw'obusingye obwo.

Nk'oku iwe hati orikwetegyereza oku turikucwamu oku eki Ekanisa y'Amazima yaabaire eri (eki yaabaire eri ahari Pentekoote kandi n'eki yaabaire eri omu busingye bw'Entumwa nk'oku kyorekirwe omu Kigambo omu Kitabo ky'Ebyakozirwe) nitubaasa kukoresa enkora egyo kutworeka ekanisa nk'oku yaaremire. Okuhaba kw'amaani, nari shi obuhabe, obwashensheire omu kanisa y'okubanza kandi obwashuurwirwe omu Bitabo by'Ebyakozirwe n'Okushuuruurwa kandi n'omu Mabaruha g'Engiri nibwija kuguma nibweyongyera kandi nibweyongyera kweyoreka butunu omu kwihaihana kwa buri busingye, okuhitsya obu amazima garaashwekyerwe kimwe omwirima aha muheru, nari omu Busingye bwa Laodikia.

Hati omu kishumuruza eki ky'okubanza eki tutungire kuruga ahari Mukama, aho nihaija agandi mazima agarikutangaaza kwonka makyeho. Ngambire ngu Ekanisa y'Amazima neiya kuguma neegyezaho kushushana nk'oku yaabaire eri omu Kitabo ky'Ebyakozirwe. Ekyo kihikiire kimwe. Kwonka tushangire ngu Ekigambo nikyongyera kwegyesa aha kutaahirirwa obuhabe okuhitsya obu amazima garaashwekyerwe kimwe omwirima omu biro by'aha muheru obu Mukama arikwija kuba ari haihi kureebeka. Ekibuuzo hati nikiimuka omu mitima yaitu; Ruhanga atsigaho Abe kandi abareka ngu bagwe omu mbeera y'okuhabisibwa kyarimwe? Tikirikubaasika ahabw'okuba Ekyahandiikirwe nikigamba bwerure omuri Matayo 24:24 ngu, “Entoore” TIZIRIKUBAASA kuhabisibwa. “Ahakuba haryaimuka abarikweyeta Kristo na baanabi b'ebishuba, baryakora obumanyiso bukuru n'eby'okutangaaza, babone kuhabisa n'entoore, KYABA NIKIBAASIKA.” Mbweni niki? Eky'okugarukamu nikireebekyera kimwe omu maisho gaitu. Hariho Ekanisa y'Amazima n'ekandisa y'ebishuba. Hariho Omuzaabibu gw'Amazima n'omuzaabibu gw'ebishuba. Kwonka n'ekya buzima egyo kanisa y'ebishuba, omubiri gw'omuzaabibu gw'ebishuba, nigwija kuguma nigugyezaho kutwara omwanya gw'Ekanisa y'Amazima kandi n'okurwanirira ngu bo, zitari Ntoore, nibo b'amazima kandi abeesigwa. Omuzaabibu gw'ebishuba nigwija kugyezaho kwita ogw'Amazima. Okwo nikwo kyabaire kiri omu Kitabo ky'Ebyakozirwe, okwo nikwo kyorekirwe omu busingye mushanju, kandi nikwo kirangiriirwe omu Baruha z'Engiri ezitari zimwe. Okwo nikwo kitwire kiri. Okwo nikwo kiri hati. Okwo nikwo kiriba. Tikibaasa kuhinduka.

Hati ahi twahika twegyendesereze munonga tutaburabuzibwa. N'ahabw'ekyo nituza kusherura Ekigambo kuhama ekiteekateeko eki. Reka tugarukye enyima omu Kitabo ky'okubanza, Okutandika. Omu Kibanja ky'omuri Edeni hakaba harimu emiti EBIRI. Gumwe gukaba guri murungi; ogundi gukaba guri mubi. Gumwe gukarugwamu AMAGARA, ogundi gwarugwamu Okufa. Hakaba hariho abaana babiri omu kubanza abaareetsire emitiojo ahari Ruhanga. Ekyo ka nkigarukyemu, bombi bakatambira Ruhanga ebitambo. Okutandika 4:3-5 “Ebiro ku

byagyenzire nibihingura, Kaini yaareetera MUKAMA omutoijo gw'ebi yaahingire. Na Abeeli yaareeta aha mijigaijo y'entaama ze n'ebishaju byazo. Ruhanga yaasiima Abeeli n'ebi yaatoija; kwonka tiyaasiima Kaini n'ebi yaatoija.” Kwonka omwe (Kaini) akaba ari mubi, ari owa ishe (Omubi Ogwo), obwo Abeeli we yaabaire ahikiriire omu maisho ga Mukama. Ogundi murundi, hakaba hariho abaana babiri abaabaire bazairwe abazaire bamwe. Bakaba bari empasha za Isaaka na Rebeka. Omwe akaba ari entoore ya Ruhanga kandi ondijjo akaba ari o

arikusiimwa. Bombi bakaramya Ruhanga. Buri murundi hakaba harimu kuramya Ruhanga. Buri murundi omubi akanga ohikiriire kandi yaahiiga ohikiriire. Obumwe n'obumwe omubi akaba acwekyereza ohikiriire. Kwonka yetegyerereze. Bakabyarwa hamwe. Baatuura hamwe. Boona bakaba nibeeyeta aba Ruhanga kandi nibaramya Ruhanga.

Eby'okureeberaho ebi nibyoreka omu bwijwire orufumu rwa Mukama Yesu Kristo obu Yaagira ngu Obukama bw'omu iguru bukaba nibushushana nk'omuntu owaabibire embibo nungi, bwanyima omubi akaija akabibamu enkyenzi omu mbibo ezo enungi. Ruhanga tarabibire enkyenzi. Sitaane niwe yaabibire ezo nkyenzi omu mbibo enungi za Ruhanga. Ebimera ebyo bibiri (abantu), kuruga omu mbibo ibiri ezitarikushushana, bikakura hamwe. Byatunga ekiriisa ekirikushushana omu itaka rimwe, byabagana omushana gumwe, enjura n'ebirungi ebindi byona, kandi byombi byagyeshwa omu bwire bwabyo. Nookireeba? Oteebwa amazima aga twaba nitwega aha busingye bw'ekanisa na bwanyima obumanyiso. Kandi ekirikukira byona, oteebwa ngu n'omu busingye obu obw'aha muheru, obu enkyenzi ezi zirikubohwa ahabw'okwokibwa, obu barikwija kwihamu oburo n'amaani bukahunikwa Mukama.

Niinyenda kugumizamu kuhitsya aha muheru ndikutwara ekiteekateeko eki, n'ahabw'ekyo ka tweyongyereho omu maisho orutambo rumwe. Orashomireho ebyafaayo by'okusisiimuka? Hati okusisiimuka nikyoreka enkora ya Ruhanga omu maani. Obwire bwona Ruhanga ku akora, Sitaane nawe aba ari aho kukora. Tikirikubaasa kuba okundi. Omu biro by'okusisiimuka kw'amaani okwa Welsh (kandi abarikukira obwingi tibarikumanya eki), abagw'eiraro bakajurirana omu marwariro g'abashazi ahonaaho, kandi haabaho okweyoreka kw'amaani maingi ga sitaane nigagezaho kumaraho okuta omutima ahari Ruhanga. Kihandiikirwe ngu omu biro bya Wesili abantu bakaba bakora ebintu by'omutaano munonga ebyabaire biri ebya Sitaane buzima kugezaho kushekyerera oburungi n'amaani ga Ruhanga. Omu biro bya Luteeri nikigambwa ngu eky'amahano ky'obuheereza bwe kikaba kitari omu kugira ngu akahakanisa kandi yaasingura Ekanisa Enkatorika ya Rooma, kureka eky'amahano kikaba kiri omu kubaasa, kandi akabaasa kuguma ahamire kandi atebekaine ahagati y'abaabaire nibarengyesereza omu kwikiriza kwabo kaingi abaabaire baijuziibwe, kandi nibeebemberwa emyoyo mibi. Kandi ku oraabe otwire noomanya obuheereza bw'ebiro eby'aha muheru, nooza kwetegyerereza okutaahirirwa nikwo kumwe kw'emyoyo mibi y'ebishuba. Nikiteekwa kuba kityo. Hati nyine amatsiko kandi niinyesiga ngu noota omutima ahaby'omwoyo ekirikugasha kuyetegyerereza, kandi n'okukihangusya okakyejunisa.

Okufundikira enshonga egi aha Muzaabibu gw'Amazima n'ogw'ebishuba ejwangaine kandi n'okworeka emyoyo ebiri erikukora ka tureebe omuri I Yohaana 4:1-4, na Yuda 3, 4, 12. “Abarikukundwa, mutaikiriza buri mwoyo gwona, kureka mubanze mwegyerereze emyoyo ku eraabe eri eya Ruhanga; ahakuba baanabi baingi ab'ebishuba baizire omu nsi. Aha niho tumanyira Omwoyo wa Ruhanga; buri mwoyo gwona ogugamba ku Yesu Kristo yaiziire omu mubiri, guba niguruga ahari Ruhanga; kandi omwoyo gwona ogutagamba Yesu gutyo, guba gutari gwa Ruhanga. Ogwo n'omwoyo gwa antikristo ogu mwahurire ngu nigwija, kandi NA HATI GWAHIKIRE omu nsi. Imwe abaana bato, muri aba Ruhanga, kandi mubasingwire (omwoyo gwa antikristo), ahakuba Ori (Omwoyo wa Ruhanga) omuriimwe ni mukuru okukira ori omu nsi.” Yuda 3, 4, 12. “Abarikukundwa, ku naabaire niinyezirika munonga kubahandiikira eby'okujunwa kwaitu twena, nkagyemwa kubahandiikira nimbeehanangiriza kurwanira munonga okwikiriza oku ABARIKWERA baahairwe rimwe kikahwa. Ahakuba hariho ABANTU BAMWE (batari Abarikwera) abashensheire omuriitwe batamanyirwe” (aba tibarataahire omu itsibikiro nibaraba omu IREMBO n'ahabw'ekyo n'abambuzi), “abaarangirwe ira ku baricwerwa orubanja oru; n'abantu ABATATIINA Ruhanga, abahindura embabazi za Ruhanga orwekwatso ngu bashambane, bakeehakana Omutegyeki (Mukama Ruhanga) waitu omwe wenka kandi Omujuni (Mukama) waitu Yesu Kristo.” “Abo, ku baba nibarya NAIMWE, ni nk'amabara agarikushiisha amagyenye gaanyu ag'okukundana; n'abariisa b'entaama abariisa enda zaabo batarikutiina.” Tikirikubaasa kuhakanisibwa omu maisho g'Ebyahandiikirwe ebirikugira ngu Ekanisa y'Amazima n'ekanisa y'ebishuba zishobenkaine, ahabw'okubyarwa hamwe kwonka ziri embibo ezitarikushushana.

Hati mbwenu, ninteeekateeka ngu hariho ekindi kintu eki oshemereire kumanya. Amakanisa mushanju agu Yohaana arikwanjura gari omuri Asia Enkya kandi goona n'amakanisa g'Abanyamahanga. Tarikugamba aha kanisa ya Yerusalemu eyaabaire kukira munonga eri ey'Abayudaaya obundi n'Abanyamahanga bakye. Enshonga eri ngu Ruhanga akaba arugire aha Bayudaaya agarukire aha Banyamahanga. N'ahabw'ekyo obusingye bw'ekanisa bwona ni Ruhanga naakoragana n'Abanyamahanga, obwo Naayeyetera Omugore w'Omunyamahanga. Ekyo nikikora “Obusingye bw'Ekanisa” kandi “n'Okwijura kw'ebiro by'Abanyamahanga” ekintu kimwe. Ebyakozirwe 13:44-48, “Ahari Sabato egyo ab'omu rurembo haihi boona baateerana kuhurira Ekigambo kya Ruhanga. Kwonka Abayudaaya ku baareebire emitwe y'abantu, baagira eihari ringi, baahakanisa ebigambo ebyagambirwe Paulo, baamujuma. Paulo na Barunaba baagamba n'obumanzi, bati: Kikaba kishemereire kuba niimwe mwabanza kugambirwa Ekigambo kya Ruhanga; mbwenu obu mwakyanga, mukeeyoreka ku mutashemereire magara agatahwaho, reeba twahindikira Abanyamahanga. Ahakuba Mukama waitu nikwo yaaturagiire ati: Nkutaireho kuba Omushana gw'Abanyamahanga ngu otware okujunwa, okuhitsya aha muheru gw'ensi. Abanyamahanga ku

baakihuriire, baashemererwa, baahimbisa Ekigambo kya Ruhanga; boona abatooraniirwe amagara agatahaho baikiriza.” Abarooma 11:1-8, “Mbwenu nimbuuza nti: Ruhanga akacwera kimwe abantu Be? Ngaaha! Ahakuba naanye ndi Omwisraeli ow'omu nda ya Abrahamu omu ruganda rwa Benyamiini. Ruhanga taracwire bantu Be abu Yaamanyire batakabaireho. Timurikumanya ebi Ebyahandiikirwe bigamba ahari Eliya, oku yaaregire Abaisraeli ahari Ruhanga? Ati: Mukama baitsire baanabi Baawe, basheenyire amatambiro Gaawe; niinye ntsigaireho nyenka, kandi naanye nibenda kuunyita. Beitu Ruhanga akamugarukamu ata? Ati: Nyetsigariize abantu enkumi mushanju abatakatsimbiraga Baali maju. Na mbwenu omu bunaku obu nikwo biri; hariho abantu bakye abatsigaireho abaatoorainwe embabazi. Kwonka, ku biraabe biri ahabw'embabazi, tibikiri habw'emirimo; ahakuba ku kyakubaire kitari kityo, embabazi tizaakubaire mbabazi. Mbwenu tugambe ki? Tuti: Abaisraeli tibaraboine ki baasherwire; kureka abatoorainwe nibo baakiboine; kwonka abandi bakagangaazibwa, nk'oku kyahahandiikirwe ngu: Ruhanga akabaha omutima gw'okuhungira, n'amaisho ngu batareeba, n'amatu ngu batahurira n'okuhitsya eriizooba.”

Abarooma 11:25-29, “B'eishe-emwe, niinyenda ngu mushoborokyerwe enaama egi, murekye kweyeta abanyabwengye. Mumanye ku ekicweka ky'Abaisraeli kyagizire obugangaazi, okuhitsya obu Abanyamahanga baritaaha omu kanisa, bakahika omubaro oguhikire; obwo Abaisraeli boona baryajunwa, nk'oku kyahandiikirwe ngu: Omujuni aryaruga omuri Saayuuni, aihe omuri Yakobo okutatiina Ruhanga; kandi egyo niyo ndagaano Yangye nabo, ku ndibaihaho ebibi byabo. Omu by'Engiri bo n'abazigu ba Ruhanga ahabwanyu; kwonka omu by'okutooranwa Ruhanga n'abarikukundwa ahabwa baishenkurubo. Mumanye ngu (ebiconco) n'okweta (kwa Ruhanga tibwegamira kweteisa).”

Aga makanisa mushanju agari omuri Asia Enkye hakaba harimu emitwarize ei gaabaire gaina umurigo, omu biro ebyo ebya ira, eyaahindikiremu ekijuma ekyezire omu busingye obwakuratsireho. Ezaabaire ziri embibo ezimezire obwire obwo bwanyima zikakura zaaba ez'okugyasha, nk'oku Yesu yaagambire ati, “Mbwenu ku baraabe nibagira bati omuti omubisi, ogwomire gwo baryagugira bata?” Luka 23:31.

OBUTUMWA AHA KANISA YA EFESO

Okushuuruurwa 2:1-7

Handiikira maraika w'ekanisa ey'omuri Efeso, oti: Ebi nibyo bigambo by'Ogwo Okwaitse enyonyoozi mushanju omu mukono Gwe gwa buryo, kandi Ogyenda naataayaayira ebikondo by'etabaaza mushanju eby'ezaabu.

Ati: Nimmunya ebi orikukora, okwezirika kwawe, n'okugumisiriza kwawe; kandi nimmunya ku otabaasa kugumisiririza abantu babi, kandi ku waayetegyereize abeeyeta entumwa, haza batari bo, okashanga bari ab'ebishuba.

Nimmunya ku ogumisiriza, kandi ku oyemera bingi ahabw'Eiziina Ryangye, kandi ku otakaruhaga.

Kwonka Nyine eki ndikufa naiwe; okareka okukunda kwawe okw'okubanza.

N'ahabw'ekyo oijukye ahu waihire waaza kugwa, oyeteise, ogarukye okore nk'oku waabaire nookora okubanza. Ku oraabe otakozire otyo, Ndyaija ahariwe, nyihe ekikondo ky'etabaaza yaawe omu mwanya gwakyo, ku oriba oteeteisize.

Kwonka eki oine, oyanga ebi Abanikolaiti bakora, Naanye ebi nyanga.

Oine amatu ahurire eki Omwoyo arikugambira amakanisa. Orikusingura Ndyamwikiriza kurya aha Muti gw'Amagara, Oguri omuri paradiiso ya Ruhanga.

ENTUMWA

Entumwa (maraika) aha kanisa ya Efeso akaba ari entumwa Paulo. Okugira ngu akaba ari entumwa aha busingye bw'okubanza bw'obwire bw'Abanyamahanga tikirikubaasa kuhakanisibwa. N'obu Petero yaahairwe obushoboorozi kwigura enyigi aha Banyamahanga, kikaheebwa Paulo kuba niwe yaaba entumwa kandi nabi waabo. Akaba ari Nabi - Entumwa aha Banyamahanga. Ofiisi ye y'obwa nabi eyaamubaasiise kwakiira okushuuruurirwa okwijwire kw'Ekigambo ahabw'Abanyamahanga, kikamuhama kuba entumwa yaabo. Ezindi ntumwa omuri Yersaalemu eki zikakiikiriza. Abagalatia 1:12-19, “Ahakuba tindagihairwe muntu, kandi tindagyegyesiibwe, kureka nkagishuuruurirwa Yesu Kristo. Nimpama ngu mukahurira aha by'emitwarize yangye eya ira omu diini y'Abayudaaya, oku naarengyesereize kuhiiga ekanisa ya Ruhanga, ngu ngiihireho kimwe; kandi nkahingurana omu diini y'Abayudaaya, n'okukira naakira baingi abu naanyetsire nabo omu ihanga ryangye, nyine obweziriki bwingi munonga bw'okugumya emigyenzo ya baatatenkuru. Kwonka Ruhanga Owantooraine nkiri omu nda ya maawe, akanyeta ahabw'embabazi Ze, ku Yaasiimire kunshuuruurira Omwana We ngu mmurangye omu Banyamahanga, ahonaaho tindehanwize aha bantu nyabantu, n'obu kwakuba okwinamuka Yersaalemu kwehanuuzi aha ntumwa ezambandiize, kureka nkaza omuri Buharabu; bwanyima naagaruka Damasiko. Ku haahingwireho emyaka eshatu, nainamuka Yersaalemu kureeba Keefa, naamara nawe ebiro ikumi na bitaano. Kwonka omu zindi ntumwa tiinyine i naareebire kureka Yakobo murumuna wa Mukama waitu.” Abagalatia 2:2, “Nainamukayo ahabw'ebi naashuuruurirwe; naabashoboorera Engiri ei mbuurira omu

Banyamahanga, kwonka omu mubonano aha baabaire nibasiimwa ahabw'obukuru, ngu ndekye kushusha nk'orikwirukira busha, nari nk'owairukiire busha." Abagalatia 2:6-9 "Kandi abo abaabaire nibasiimwa ngu ni bakuru - oku baabaire bari ira, ebyo timbyetaireho; Ruhanga tashoroora mu bantu ahabw'obuganzi - abakuru abo tibaine ki baanyongyeireho, kureka bakeetegyereza ku naakwatsiibwe Engiri kugibuurira Abanyamahanga, nk'oku Petero yaagikwatsiibwe kugibuurira abashazirwe. (Mumanye ngu Owaabaasiise Petero kuba entumwa aha bashazirwe, naanye Niwe yambaasiise kuba entumwa aha Banyamahanga). Ku baayetegyereze omugisha ogu naahairwe, Yakobo na Keefa na Yohaana, abaabaire nibasiimwa kuba enyomyo, baatuha omukono gwa buryo, nyowe na Barunaba, okworeka ku bakwataniise naitwe, ngu itwe tugyende omu Banyamahanga, nabo omu bashazirwe." Abarooma 11:13, "Kwonka nimbagambira imwe Abanyamahanga. Nk'oku ndi entumwa aha Banyamahanga, nimpimbisa obutumwa bwangye."

Paulo akatandika ekanisa ya Efeso nk'ahagati y'ekyasha ky'okubanza. Eki nikitubaasiisa kutaho omwaka ogu Obusingye bw'Ekanisa ya Efeso bwatandikiireho; nk'omu gwa 53 A.D.

Omuringo gw'okuheereza kwe gukataho eky'okureeberaho eki entumwa z'omu biro by'omu maisho zaabaire zishemereire kugyenderaho, kandi buzima nigutaho eky'okureeberaho ahabw'omuheereza weena wa Ruhanga w'amazima n'obu yaakuba atahikire aha rurengo rwa nabi rw'ahaiguru nk'orwa Paulo. Obuheereza bwa Paulo bukaba bwine eky'omutaano ky'enyabushatu kandi kikaba kiri nk'oku biri ahaifo:

Eky'okubanza kya byona, Paulo akaba ari omwesigwa aha Kigambo. Tarakiteishukireho n'obu haabaire habaho ki. Abagalatia 1:8-9, "Kwonka ku haakugira owaababuurira engiri etari nka i twababuuriire, yaaba itwe n'obu yaakuba maraika orugire omu iguru, akyeenwe. Nk'oku twagambire ira, na hati nikwo ndikugamba nti: Omuntu weena orikubabuurira endiijo ngiri etari i mwaikiriize, akyeenwe." Abagalatia 2:11, 14, "Kwonka Keefa ku yaahikire Antiokia, naamuhakanisiza kimwe nitureebana, ahakuba akaba ashobize butunu." "Kwonka ku naareebire bataakuratira mazima g'Engiri, naagambira Petero omu maisho ga boona nti: Iwe ku oraabe nootwaza nk'Abanyamahanga, etari mitwarize y'Ekiyudaaya, haza ori Omuyudaaya, ahabw'enki noogyema Abanyamahanga kutwaza nk'Abayudaaya?"

Abakorinso 14:36-37, "Mbweni, nimugira ngu niimwe Ekigambo kya Ruhanga kyakomookiremu? Nari niimwe mwenka abu kyaiziire? Omuntu weena orikweteekateekaho ngu ni nabi, nari ow'Omwoyo, amanye ngu eki mbahandiikiire n'ekiragiro kya Mukama."

Yetegyereze ku Paulo yaabaire atatumirwe kibiina ky'ediini, kureka akeebemberwa Omwoyo, nk'obu Ruhanga yaija ahari Musa kwebemberwa Abaisraeli okuruga Misri. Orukiiko rwa Yerusalemu tirwo rwatumire Paulo, n'obu kwakuba kumugiraho obushoboorozi nari okumutegeyeka. Ruhanga, kandi Ruhanga wenka, niwe yaamutumire kandi akamwebemberwa. Paulo akaba atatumirwe bantu, kureka akatumwa Ruhanga. Abagalatia 1:1, "Paulo entumwa, etatumirwe bantu, kandi etareetsirwe muntu, kureka eyatumirwe Yesu Kristo na Ruhanga Ishe Owaamuzoire omu bafu." Abagalatia 2:3-5, "Nangwa na Tito ou twagyendaine, n'obu araabe ari Omugriika, taragyemirwe kusharwa. Kwonka hakaba hariho ab'eishe-emwe ab'ebishuba, abaataahire omuriitwe bwesherekye kutata obusingye bwaitu obu twine omuri Kristo Yesu, ngu batugarure omu buhuuku. Abo tituraboobeire nangwa n'akaingana busha, ngu amazima g'Engiri gabone kurindwa ahabwanyu."

Eky kabiri, obuheereza bwe bukaba buri omu maani g'Omwoyo, omu buryo obwo nibworeka Ekigambo ekyagambirwe kandi ekyahandiikirwe. 1 Abakorinso 2:1-5, "B'eishe-emwe, obu naija owaanyu, tindaizire nimbagambira enaama ya Ruhanga nk'omugambi murungi nari omunyabwengye; ahakuba nkamariirira kutagira kindi kyona eki naamanya omuriimwe, kureka Yesu Kristo, Ogwo owaabambirwe. Nkaba ntuura naimwe, nyine obweremwa, n'obwoba bwingi, nintetema. Emigambire yangye n'obutumwa bwangye bikaba bitari bigambo by'obwengye eby'okwikiririsa abantu, kureka eby'okubooreka Omwoyo n'amaani, ngu okwikiriza kwanyu kutegamira obwengye bw'abantu kureka amaani ga Ruhanga." Ebyakozirwe 14:8-10, "Omuri Lusitura hakaba harimu omushajja, owaabaire atarikubaasa kugyendesha maguru, owaazairwe ari ekirema, otakagyendahoga. Ogwo yaahurira Paulo naagamba. Paulo, ku yaamwetegyereze, yaareeba ku aine okwesiga ngu naabaasa kutambirwa, yaagamba n'eiraka rihango, ati: Imuka, oyemerere n'ebigyere byawe. Yaabandatuka, yaagyenda." Ebyakozirwe 20:9-12, "Kandi omutsigazi orikwetwa Yutuko akaba ashutami omu dirisa; yaagira oturo twingi; Paulo ku yaagumiizemu naagamba, Yutuko ogwo yaarembibwa oturo, yaahanantuka omuri kanyinaishatu, yaagwa ahansi, baamwihaho akabire. Paulo yaashuuma, yaamwinamaho, yaamubumbatira, naagira ati: Mutacura, ahakuba akihuriire. Paulo yaagaruka yaatamba, yaabega omugati, yaarya, bwanyima yaagumizamu naagaaniira nabo omwanya muhango okuhitsya omu kasheeshe; atyo yaagyenda. Omutsigazi ogwo baamwihayo ahuriire, baagarukwa emitima omunda." Ebyakozirwe 28:7-9, "Haihi n'omwanya ogwo hakaba hariho emisiri y'omutegeyeki mukuru w'ekirwa ekyo orikwetwa Pubulio, yaatwakiira, yaatukunira gye ebiro bishatu. Kandi ishe wa Pubulio akaba arwaire omushwija n'esheshe. Paulo yaataaha omu nju ye, yaamushabira, yaamutaho engaro, yaamukiza. Ekyo ku kyakozirwe, n'abandi barwaire ab'omu kirwa ekyo baija, baatambirwa." 2 Abakorinso 12:12, "Buzimazima ebirikuhamya entumwa nkabikorera omuriimwe omu kugumisiriza kwingi, ninkora obumanyiso n'eby'okutangaaza n'eby'amaani."

Eky kashatu, akaba aine ebyana ebirikureebwa by'okuhanyama obuheereza obu yaahairwe Ruhanga. 2 Abakorinso 12:11, "Mbaire omushema, kwonka niimwe mwakingyemire; ahabw'okuba niimwe mwabaire mushemereire kumpimbisa. Mumanye ngu, n'obu ndaabe ntari kintu, ezo ntumwa nkuru munonga tiziine ki

zankirize na kakye.” 1 Abakorinso 9: 2, “N'obu ndaabe ntari ntumwa aha bandi, kwonka ahariimwe ndi entumwa; ahabw'okuba imwe muri akamanyiso omuri Mukama k'okuhanya ku ndi entumwa buzima.” 2 Abakorinso 11:2, “Ahakuba nimbagirira eihato rya Ruhanga, ahabw'okuba nkabahingira Kristo, ngu mbareete omu maisho Ge nk'omwishiki oshugaine oku ahingirwa omushaija omwe.” Paulo akaba ari ekikoreso ky'okureeta omutwe muhango gw'entaama z'Abanyamahanga; akaziriisa, yaazifaho, okuhitsya obu zaayanire ebyana by'okuhikiirira zityo zaatebeekanisibwa okubugana Mukama nk'ekicweka ky'omugore Omunyamahanga.

Omu bwire obu Okushuuruurwa kwaheereirwemu, kurugiirira oku byagambirwe, Paulo akaba yaaherize kufeera okwikiriza kwe, kwonka Yohaana akaba naakigumizamu omu mwanya gwe buzima nk'oku Paulo yaabaire yaakozire omu bwire bw'obuheereza bwe. Okufa kwa Paulo, Okushuuruurwa kutakahairwe, tikirikubaasa kwihaho na kakye okugira ngu akaba ari entumwa aha Busingye bw'Ekanisa ya Efeso, ahabw'okuba entumwa ya buri busingye, kitaine kakwate obu yaarebeka nari obu yaagyenda, niwe ogwo ou amagara ge garikuhindura obusingye obwo ahabwa Ruhanga kurabira omu buheereza bw'Ekigambo kyorekirwe. Paulo akaba ari omuntu w'omuringo ogwo.

ORUREMBO RWA EFESO

Orurembo rwa Efeso rukaba ruri rumwe omu ndembo ishata ezirikuriraye obukuru omuri Asia. Kaingi rukaba rwetwa orurembo rwa kashatu orw'enyikiriza y'Ekikristaayo, obwo Yerusalemu ruri orw'okubanza, kandi Antiokia ruri orwa kabiri. Rukaba ruri orurembo orutungu munonga. Obutegeyeiki bukaba buri obw'Abarooma kwonka orurimi rukaba ruri Orugriika. Ab'ebyaafayo baikiriza ngu Yohaana, Mariamu, Petero, Anderea na Filipo boona bakaziikwa omu rurembo oru orurungi. Paulo, owaatandikireho okwikiriza kw'amazima omu rurembo oru, akakora aha omurimo gw'omuriisa kumara nk'emyaka eshatu; kwonka ku yaabaire aba atari n'obusyo bw'entaama akaba aguma omu kushaba, naabateekateekaho munonga. Timoseo niwe yaabaire omureeberezi waayo w'okubanza. 1 Timoseo 1:1-3, “Nyowe Paulo, entumwa ya Kristo Yesu ahabw'okuragiirwa Ruhanga Omujuni waitu, na Kristo Yesu amatsiko gaitu, naakuhandiikira, Timoseo omwana wangye buzima omu kwikiriza; ninkwendeza embabazi n'okusaasirwa n'obusingye ebirikuruga ahari Ruhanga Isheboona na Kristo Yesu Mukama waitu. Ku naabaire ninza Makedonia, nkatsiga naakwehanangiriza ku oguma Efeso, ngu obone kuhana abantu bamwe barekya kwegyesa endiijo nyegyesa.”

Eryo iziina, Efeso, riine amakuru g'emiringo ebiri agarikutangaaza, “Okugira ekigyendererwa,” kandi “N'okuba binkwatiireki.” Ekyetengo kikuru ky'obusingye obu obwabaire butandikireho n'okwijura kw'Omwoyo, “enaama za Ruhanga” eki baabaire bagyendereire kuhika aha kweta kukuru kwa Ruhanga, bakatandika kuza omu mbeera y'okutafayo. Okukyendeera omu kwehayo kwabo kw'okukuratira Yesu Kristo kukatandika kweyoreka nk'akamanyiso ku omu busingye bw'ebiro by'omu maisho emotoka eriho erikwetwa ekanisa yaabaire neija kutobera omu bubi “bw'enama za Sitaane.” Ekaba ehazire kandi neetwarwatwarwa. Obusingye obu bukaba bwatandikire kugaruka anyima. Bukaba butsigireho rukundo yaabwo ey'okubanza. Embibo nkye munonga eyaabyairwe omu Busingye bwa Efeso ekiro kimwe ekaba neija kukura omu mwoyo gw'obuhabe kuhitsya obu amahungu mabi goona ag'omu mwanya gaabaire nigaija kwarika omu mataagi gaayo. Egyo mbibo nkye emezire omu miteekateekyere y'obuntu ekaba neija kureebeka nk'etaine nshonga ahari Haawa Musya ogwo (Ekanisa Nsya) kandi ngu ekanisa ekaba neija kugaruka ebeihwabeihwe Sitaane. Obusingye bwa Efeso bukaba buhaire ekanisa ebigambo ebirikuriraye oburungi bya Ruhanga, kandi ahabw'akaanya kakye ekanisa ekasingura, bwanyima yaagaruka anyima, kandi omu kaanya ako obu yaabaire etafiireyo Sitaane akabyaramu embibo y'okuhwerekyerereza kimwe.

Ediini egyo eya Efeso neeshushanisiza kimwe obusingye obu obw'ekanisa y'okubanza kandi etaho emigyendere y'obusingye oburikukurataho. Eky'okubanza, hekalu erikumurinkana y'emandwa Diana, eyaamazire emyaka mingi neeyombekwa, omu bikaari byayo ebirikutiinwa hakaba nihashangwamu ekishushani ky'emandwa Diana ekyabaire nikikiraye okutamurinkana kandi n'okureebeka gye nk'oku omuntu yaakuteekateekire. Ekishushani kya Diana eki kikaba kitarikushushana na kakye n'ebindi bishushani byakyo ebyabaire biri omu zindi hekalu ezaabaire zikihongyeirwe. Kikaba kiri ekishushani ky'omukazi ekyabaire kiine ekyemerero kibi aha muheru ekyatobeire omu mpimbi y'ekiti ei kyabaire kibaizirwemu. Kandi emikono yaakyo ebiri ekaba ekozirwe omu mitahimbwa ebiri ya buriijo y'ekyoma. Eki ka kyabaire kihikiire kimwe omu kworeka omwoyo gwa antikristo ogurekwirwe omu busingye bw'okubanza. Okwo antikristo akarekurwa ahagati y'abantu, kwonka tiyaagira nshusha y'okutiinisa abantu. Kandi emikono ebiri y'emitaahimbwa y'ekyoma ekaba neeyoreka ku kyabaire kiri ekigyendererwa kya antikristo kwatagura omurimo gwa Ruhanga omu kutaahirira kwe. Kandi tihariho n'omwe owaareebekire nk'omweteireho nari eki yaabaire naakora. Kwonka eizooba rimwe bakaba nibaija kumwetegeyereza, obu n'egyo mikono y'ekyoma “ebikorwa” bye byabaire nibiza kuba “enyegyesa,” kandi n'enyegyesa ye ekaba ekiragiyo ky'obukama.

Entwaza y'okuheereza omuri hekalu egi nayo neeshuuruura bingi. Eky'okubanza kya byona, hakaba hariyo abanyamurwa abaabaire bari abakonwa. Obunyamurwa obu obutarikubaasa kuzaara bukaba nibushushanisa abantu abaabaire nibaija kuruga aha Kigambo, ahakuba abantu abarikugira ngu nibamanya Ruhanga bakahigika Ekigambo tibaine magara nk'omukonwa otarikubaasa kuzaara. Ekyaba kabiri, omu bikaari bya hekalu hakaba harimu abanyamurwakazi abashugaine abaabaire bakora emigyenzo y'ediini omuri hekalu. Eki kikaba nikyoreka eizooba eri emikoro n'entwaza, ebikorwa by'ediini n'emirimo, byabaire nibiza kutwara omwanya gw'Omwoyo Orikwera kandi okweyoreka kw'Omwoyo Orikwera omu biconco kukaba kutarikwija kugaruka kwijura omuri

hekalu ya Ruhanga. Owaabaire abakurira boona akaba ari omunyamurwa mukuru, omushaija w'obushoboorozi bw'eby'obutegeye kandi orikutuma abandi baakora ebi arikwenda, kirikworeka ekyabaire nikigyenda omu maisho, n'obu kiraabe kyabaire kitoorekirwe kurungi munonga, ekirikumanyisa, ekanisa ekaba neija kuheebwayo omu bwebembezi bw'omuntu na zaapuraani z'omuntu n'ebigyendererwa by'omuntu kandi "oku nikwo Omwoyo Orikwera arikugira" ekaba etarikwija kugumaho. Kandi ahansi yaabo boona hakaba hariho abahuuku ba hekalu abaabaire bataine bugabe bw'okwecweramu kureka okworobera abakuru b'ediini. Eki nikimanyisa ki kitari ekiro ekyabaire nikijja obu abakuru b'ediini abajwekirwe obukuru, kurabira omu kushariiriza omu bya pokopoko y'eby'obutegeye, obuhwezi bwa gavumenti, n'okuhinganisa Ekigambo n'Omwoyo ahabw'enyikiriza z'amadiini, ebijunano by'amadiini, kandi n'obwebembezi bw'abantu, byabaire nibiza kuhindura abakuratsi abahuuku obwo abeebembezi nibashemererwa omu itungo eritungirwe omu muringo mubi kandi bakeesiimira omu by'okweshemeza byabo ebitashemeire, kandi abooro abaakubaire nibaheerezibwa nk'oku Ruhanga akunda, hati bakahinduka abahuuku.

YESU, ENTUMWA YE KANDI N'AMAKANISA

Okushuuruurwa 2:1, "Ebi nibyo bigambo by'Ogwo Okwaitse enyonyoozi mushanju omu mukono Gwe gwa buryo, kandi Ogyenda naataayaayira ebikondo by'etabaaza mushanju eby'ezaabu." Ogu niwe Ogwo ou Kirikugambwaho kiti: "Yesu Ogwo ni BYOMBI Omukama kandi Kristo." Ngugwo aho, ogwo Omwe kandi Mukama Ruhanga Ow'obushoboorozi bwona Wenka, kandi tihariho ondiiyo weena kureka We. Ngugwo aho, Omujuni ("okujuna n'okwa Mukama," Yona 2:9) naagyendagyenda ahagati y'amakanisa omu busingye mushanju bwona. Oku Yaabaire ari omu busingye bw'okubanza nikwo Ari omu busingye bwona. Aha mwikiriza weena, Ni Yesu Kristo otahinduka; oku abaire ari nyomwabazyo, n'eriziiooba nikwo ari, kandi nikwo ariguma ebiro byona. Eki Yaakozire rimwe na hati Naakikikora, kandi aryagumizamu naakikora.

Hati noiya kwetegyereza ngu Yesu naagyendagyenda wenka ahagati y'amakanisa Ge. Tihariho ondi ori hamwe Nawe. Kandi buzima tabaasa kubaho, ahakuba We wenka niwe yaagikoreire okujunwa, kandi ku Yaaherize kugigira n'eshagama Ye yaaba Eye. Ni Mukama kandi Mukuru waayo. Ekanisa Neemuheereza ekitiinisa kyona kandi ekitiinisa ekyo Tarikibagana n'ondi. Tihariho paapa ori Nawe. Tihariho acibishopu ori Nawe. Mariya, nyina w'omubiri Gwe ogw'omu nsi, tari Nawe. Tarikugamba haza akahindikira Ishe, ahakuba Niwe Isheboona. Tarikuhinduka akaha Omwoyo Orikwera ebiragi, ahakuba Ni Ruhanga, Omwoyo otahwaho, n'Amagara Ge agarikusheneneka kandi agarikukoresa engoga omu kanisa nigagiha amagara, kandi kuri Atariho amagara tigaakubaireho. Okujuna n'okwa Mukama.

Tihariho owaabaire ari Nawe obu Yaaribatiirira ekikoomi ky'omuriro ogurikubuguma gw'ekiniga kingi. Akaba atari ndiijo, kureka OGWO Owaahanikirwe aha musharaba kandi akahayo eshagama Ye. Niwe Obukomooko kandi Omuhikiiriza w'okwikiriza kwaitu. Niwe Alufa na Omega w'okujunwa kwaitu. Tukahingirwa Kristo atari ndiijo. Tituri b'ekanisa. Turi Abe. Ekigambo Kye n'ekiragi. Enyegyesa, ebijunano by'amadiini, ebiragi ebyongyeirweho, n'ebiragi by'engyenderwaho tibitwineho bushoboorozi. Eego, ni Yesu WENKA Orikyendagyenda ahagati y'amakanisa. Ni Ruhanga ori omu Kanisa, orikukunda kandi orikukora nk'oku Asiimire. Ekyo otarikyebwa. Oine obuzaare bumwe bwonka ahari Ruhanga kandi na Ruhanga aine obuzaare bumwe ahariwe - obwo buzaare ni YESU, kandi YESU WENKA.

Ngugwo aho aine enyonyoozi mushanju omu mukono Gwe gwa buryo. Omukono gwa buryo nikimanyisa amaani n'obushoboorozi bwa Ruhanga. Zaaburi 44:3, "Ahakuba rurara yaabo tiyo yaabakubwize ensi, kandi n'omukono gwabo tigwo gwabajunire; kureka Omukono Gwawe gwa buryo n'amaani Gaawe, n'omushana gw'amaisho Gaawe ahakuba Okabeekundira." Omu mukono gwa buryo ogwo ogw'amaani akwaitse enyonyoozi mushanju, abo, okurugiirira omu Kushuuruurwa 1;20, n'entumwa mushanju z'ekanisa. Eki nikimanyisa ngu amaani ago n'obushoboorozi bwa Ruhanga biri enyima y'entumwa ze omuri buri busingye. Nibagyendera omu muriro n'omu maani g'Omwoyo Orikwera hamwe n'Ekigambo. N'enyonyoozi ahabw'okuba nibareeta omushana. Omushana ugu barikureeta n'omushana Gwe. Tibaine mushana gwabo bonka. Tibarikuhemba omuriro gwabo ahabwabo ngu abantu bagyendere omu nsasi z'omuriro gwabo. Isaaya 50:11. Ni nyekiro, ahakuba obwo nibwo enyonyoozi zireebeka. Ni nyekiro y'omwirima gw'ekibi, ahakuba boona (nangwa n'ensi yona), bakashiisha kandi batuura batarikuhika ha kitiinisa kya Ruhanga. Abarooma 3:23.

Entumwa ezi mushanju nizireetera abantu kumanya Ruhanga. Orikuzaakiira naaba ayaakiire Ogwo owaazitumire. Yohaana 13:20. Zigamba kandi zikoresa obushoboorozi Bwe. Naazishagika n'amaani goona g'Obwaruhanga. Matayo 28:18-20, "Yesu yaija, yaabagira ati: Mpairwe OBUSHOBOOROZI BWONA omu iguru n'omu nsi. N'ahabw'ekyo mugyende omu mahanga goona, muhindure abantu abeegi nimubabatiza omu Iziina rya Isheboona n'ery'Omwana n'ery'Omwoyo Orikwera, nimubeegyesa kworobera byona ebi Naabaragiire; kandi reeba, NDI HAMWE NAIMWE EBIRO BYONA okuhitsya obu ensi egi erihwaho (okumariira kw'obusingye)." Mbweni mbabo aho, baijwire Omwoyo Orikwera n'okwikiriza, nibaaka n'omuriro gwa Ruhanga, baine Ekigambo ky'amazima, kandi ngugwo Ayemereire aho okubashagika. Kandi kiteekatekyeho, tihariho mwikiriza n'omwe ow'obusingye bwona orikwetenga kurira omu mutima gwe, ati, "Oo, kuri naabaire ndiho obwire obwo omu busingye bw'okubanza obu entumwa zaatumwa okubanza." TIHARIHO kyetengo ky'okureeba enyima. REEBA AHAGURU! Reeba Ogwo Ou na hati arikugyendagyenda ahagati y'amakanisa omu busingye bwona. Reeba Ogwo Otahinduka oku abaire ari nyomwabazyo, n'eriziiooba nikwo ari, kandi nikwo ariguma ebiro byona; kandi Otahinduka yaaba omu mbeera nari omu mitwarize Ye. Ahu babiri nari bashatu bateeraniire omu Iziina Rye,

naaba Ari ahagati yaabo! Kandi t'okuba ahagati yaabo nk'omuroreezi otafiireyo, nari nka maraika orikuhandiika; kureka ngugwo Ayemereire aho Naayeyorekyera kimwe eki Ari buzima - Amagara kandi Orikubaisaho kandi Orikuha ebiconco byona ebirungi omu Kanisa. Haleluya!

“Ogyenda naataayaayira ebikondo by'etabaaza mushanju eby'ezaabu.” Ebigambo ebyo ka biine eki birikumanyisa waabirebera omu mushana gw'Ebyahandikirwe, Ebirikumushobooraho nka “Kristo Ori Amagara gaitu.” Ahakuba Kristo, buzima, niwe magara g'ekanisa. Ekanisa teine gandi magara. Yaaba Etamwine neeba eri ekibiina ky'ediini, ekibiina ky'abantu abari hamwe, okweteerana kw'abantu okutaine makuru. Nk'oku omutumbi oguhunzirwe kandi gujwekirwe guba gukiri omutumbi, n'ekanisa nikwo eba, n'obu zaapuroguramu zaayo n'ebikorwa by'embabazi byayo byakureetaho ki, yaaba etaine Kristo nayo n'omutumbi. Kwonka ekanisa yaaba Emwine ahagati yaayo, yaaba Emwine arikugiteera omuzimbwe, neeba eky'okutangaaza “ky'omubiri Gwe gwona, obwijwire Bwe obuhikiiriza byona omuri boona.” Kandi omuri egi shaaha Naagyendagyenda ahagati y'ekikondo ky'etabaaza ky'ezaabu eky'omu busingye bw'aha muheru. Oku yaabaire Ari obu Yaagyendagyenda omu busingye bw'okubanza nikwo Ari na hati omu busingye obu obw'aha muheru. Yesu Kristo TAHINDUKA oku abaire ari NYOMWABAZYO, N'ERIIZOBA nikwo ari kandi NIKWO ARIGUMA EBIRO BYONA.

“Ebikondo by'etabaaza mushanju eby'ezaabu.” Omu Kuruga 25:31, nihagira ngu, “Kandi oryakora ekikondo ky'etabaaza omu zaabu ESHEMEZIIBWE; omu kukikora OKIHEESHERE hamwe; ekibunu kyakyo n'omukono gwakyo n'ebikopo byakyo n'ebintu ebyebumburikire byakyo n'ebirabyo byakyo, biheesheranwe nakyo.” Ekanisa ya Yesu Kristo y'amazima, omugore, neeshushanisibwa n'ezaabu ESHEMEIRE. Okuhikiirira kw'omugore n'okuhikiirira KWE. Ebikozire omugore n'ebya KRISTO byonyini eby'ekitiinisa. Ebirikuranga omugore nibishangwa omuri Kristo. Eki Kristo ari, nikyo omugore arikiwija kworeka. Ebi Kristo aine, nibyo omugore arikiwija kworeka. Omu mugore tiharimu nshobe. Omugore weena n'ekitiinisa omunda n'enyima. Kuruga omu kutandika kuhika aha muheru omugore n'omurimo gwa Mukama we, kandi emirimo ya Kristo yona n'ehikiriire. Buzima omu mugore harimu kandi hoorekirwemu obwengye obutahwaho n'ekigyendererwa kya Ruhanga. Omuntu naabaasa ata kukimanya? Omuntu naabaasa ata kukyetegeyereza? N'obu turaabe tutarikubaasa kukora ekyo, nitubaasa kukyakiira ahabw'okwikiriza, ahakuba Ruhanga akakigamba.

Ekikondo ky'etabaaza tikiri ky'ezaabu kwonka, kureka n'eky'ezaabu EHONDAHONZIRWE. Kikozirwe emikono n'ezaabu ehondahonzirwe, kurugiirira ahari zaapuraani ezahairwe Omwoyo. Aheeru ya Mukama kandi mukuru w'omugore, Yesu Kristo, harabaireho abantu abarahondahonzirwe munonga kandi bakashemezibwa nk'omugore wa Yesu Kristo? Buzimazima omugore naijuririza okubonabona oku Yesu yaatsigireho. Ebintu by'omugore nibinyagwa. Amagara ge gari omu kabi. Naabarwa nk'entaama erikuza kubaagwa. Aitwa eizooba ryona. Naabonabona munonga, kwonka omuri ebi byona tabaihura, n'obu kwakuba kureetera abandi kubonabona. Ogu mugore omukundwa wa Yesu Kristo ashemereire Engiri. Kandi nk'oku ezaabu eyorobera orikugihonda, kunu ekyoma ky'omuringa kyo kihendeka baakihonda, egi zaabu ya Ruhanga neija kugumisiririza okubonabona kwayo ahabwa Mukama, etagondamire, etacwekire, etacwekyereziibwe, kwonka ekozirwe nk'ekintu ekiine oburungi n'okushemererwa ebiro n'ebiro kuraba omu bigyezo n'ebirengo by'amagara aga.

KRISTO NAAHIMBISA ABE

Okushuuruurwa 2:2-3, “Nimmanya ebi orikukora, okwezirika kwawe, n'okugumisiriza kwawe; kandi nimmanya ku otabaasa kugumisiririza abantu babi, kandi ku waayetegeyereize abeeyeta entumwa, haza batari bo, okashanga bari ab'ebishuba. Nimmanya ku ogumisiriza, kandi ku oyemera bingi ahabw'Eiziina Ryangye, kandi ku otakaruhaga.”

Omujuni ka naahimbisa kandi akasiima abaana Be omu muringo murungi. Naagamba aha mitwarize mirungi y'eby'omwoyo yaabo n'engyesho. Naamanya ngu omuribo harimu obweremwa, kwonka kandi tarikubujuukirira. Oku ti nk'oku Mukama atwaza? Naamanya okutwezirikisa omu nshonga ezihikire kandi n'okutatushagika omu nshonga ezitahikire. Twena nitubaasa kwega eishomo rirungi hanu omu kwebembera ekanisa n'amaka gaitu. Kandi nabwo ekirikukira oburungi, twena nitubaasa kwega eishomo rirungi oku Ruhanga akoragana na buri omwe omuriitwe buzima omu muringo ogu. Otariwewe entegye, Orikwera wa Ruhanga 'we, ahabw'okuba Ruhanga tari entasiima kwebwa emirimo yaawe ya rukundo. Eki turikukora kyona, n'obu kwakuba okuha omuntu ekikopo ky'amaizi agarikufuka, twine ekihembo n'omugisha kuruga ahari Mukama.

“Nimmanya ebi orikukora, okwezirika kwawe, n'okugumisiriza kwawe.” Yaaba Naagyendagyenda ahagati omu kanisa Ye, Naamanya okubonabona kw'abantu Be, kandi Naafayo. Nk'oku kyabaire kiri omu biro by'obukwatwa omuri Misri obu Yaahurira okutaka kwabo, Ogwo otahinduka na hati Naakihurira okutaka kw'abarikubonabonesibwa yaaba Naabagyendagyendamu. Ekigambo ekyo, okwezirika, nikimanyisa oburuhe oburikureetwa omu kubonabonesibwa. Abantu ba Ruhanga Tibamukorera omu bweziriki bwa rukundo kwonka, kureka babonabona ahabwe bashemereirwe. Nibagumisiriza omu kwekorera omugamba. Obusingye bw'okubanza obu bukabonabonesibwa munonga omu kuhiigwa. Bukaba nibuteekwa kukora n'amaani omu kubuurira Engiri n'omu kujanjaaza amazima. Okwetwa kwabo okw'ahaiguru omu magara kukaba kuri okuheereza Ruhanga, kandi amatsiko gaabo omu magara ku gaafaafatikaine bakagumisiriza baahayo byona ahari Ogwo Owaabaire abaraganiise ebihembo ebithawaho omu iguru ahabw'ebi baabaire barekire omu nsi Ahabwe.

Ningira ngu tushemereire kwemerera hanu nikwo tureebe ekiteekateeko ekirikugira ngu abantu ba Ruhanga

batuura nibahiigwa kandi nibaija kuguma nibahiigwa. Noomanya ngu Okutandika n'ekitabo ky'obukomooko, kandi ebi oraashangye byatandikiireyo nibiija kugumizamu bihikye omu Kushuuruurwa kandi tibirikuhinduka. Okwo nitureeba ngu Kaini akahiiga kandi yaita Abeeli ahabw'okuba Abeeli akashemeza Ruhanga. Kandi nitureeba ekishushani ekihikire omuri mutabani wa Abrahamu ow'omubiri, Ishimaeli, owaashekyereire kandi akarwanisa omwana ow'okuraganisibwa, Isaaka. Kandi hakaba hariho na Esau, owaayangire Yakobo kandi akaabaire yaamwitsire, kuri Ruhanga atarabitaahiremu. Omu Ndagaano Ensy nitushanga Yuda naareebya Yesu, obwo abakuru b'ediini b'omu kyasha ky'okubanza baabaire nibagezaho kucwekyereza abaikiriza aba ira. Abaana b'ensi egi, nibategyekwa Sitaane, banga abaana ba Ruhanga abarikutegyekwa Omwoyo.

N'obu Omukristaayo yaakuba ohikire kandi orikwesigwa omu maisho g'abantu, kandi n'obu yaakuba omunyambabazi ahari mugyenzi we, atarikukora kubi kureka naakora kurungi, reka ayature Kristo nk'Omujuni we kandi ayemere okukora kw'ebiconco by'Omwoyo Orikwera omu "ndimi," obunabi, okutamba n'eby'amahano, nibamucwera omushango. Omwoyo gw'ensi egi nigwanga Omwoyo wa Ruhanga, kandi ahabw'okuba gutarikubaasa kusingura Omwoyo wa Mukama nigugyezaho kuhwerekereza ekikoreso eki Omwoyo w'Amazima arikutuaramu.

Okuhiigwa n'okugyezibwa n'ebishemereire kubaho, eby'obutoosha omu magara g'Omukristaayo. Hariho ekintu kimwe kyonka eki orikubaasa kubikorera. Biheyo byona ahari Ruhanga, otacwa orubanja, kandi ebiraarugemu byona n'okucwamu kw'aha muheru obirekyere Ruhanga.

"Tobaasa kugumisiririza abantu babi; kandi ku waayetegereize abeeyeta entumwa, haza batari bo, okashanga bari ab'ebishuba." Abaefeso aba bakaba nibaikiriza ngu abantu ba Ruhanga bashemereire kuba abarikwera. Kurugiirira omu mushororongo ogu bakateera entambwe z'okurinda omubiri okutatumbisibwa ekibi. Nikireebekyera kimwe ku obuhabe bwabaire bwatandikire. Ekibi kikaba kyataahire omu kanisa. Kwonka bakaba niboobera ebigambo bya Paulo obu yaabagambira kwiha ababi omuribo. Bakaba bari abantu abeetaaniise. Bakaba barugire omu nsi, kandi hati bakaba batarikuza kwikiriza ensi kubataahamu. Bakaba batarikubaasa kugumisiririza ekibi omu kanisa. Oburikwera bukaba butari omu bigambo aharibo nari okugamba kurungi kwonka; bukaba buri amagara agu baabaire batwire.

"Kandi ku waayetegereize abeeyeta entumwa, haza batari bo, okashanga bari ab'ebishuba." Mugyenzi, oku n'okugamba bwerure. "Kandi ku waayetegereize abeeyeta entumwa." Obu t'obumanzi oburengyesereize? Ni bushoborozi ki obu abantu baine kugyeza abo abarikweyeta entumwa? Kandi nibabageze bata? Oo, eki ninkikunda. Nkiki hanu omu Bagalatia 1:8, "Kwonka ku haakugira owaababuurira engiri etari nka i twababuuriire (kare), yaaba itwe n'obu yaakuba maraika orugire omu iguru, akyeenwe." N'entumwa ezaareetsire Ekigambo ekyabandize aha bantu. Ekyo Kigambo ekyabandize kikaba kitarikubaasa kuhinduka, n'obu kaakuba akatoonyezi nari akashare kaakyo. Paulo akaba naamanya ngu Ruhanga Niwe yaabaire agambire nawe, n'ahabw'ekyo akagira ati, "N'obu naakwija nkagezaho kureeta okushuuruurirwa kwa kabiri, nkagezaho kuhinduraho kakye omu bi naabahaire omu kubanza, nkyeenwe." Noreeba, Paulo akamanya ngu okushuuruurirwa kw'okubanza kukaba kuhikire. Ruhanga tarikubaasa kuha okushuuruurirwa kw'okubanza, bwanyima akaha okwa kabiri. Yaakikora atyo, Naaba yahinduka aha nteekateka Ye. Naabaasa kuha okushuuruurirwa bwanyima ayongyereho, nk'oku Yaakozire omu Kibanja kya Edeni obu Yaaganisa Oruzaaro omukazi, reero bwanyima Akagira ngu orwo Ruzaaro rukaba niruteekwa kurabira omuri Abrahamu, bwanyima akagira ngu rukaba nirwija kurabira omu kika kya Daudi. Kwonka kukaba kuri okushuuruurirwa kumwe. Kikaha buha abantu amakuru ageeyongyereho kubahwera kugaakiira n'okugeetegereza. Kwonka Ekigambo kya Ruhanga tikibaasa kuhinduka. Orwo Ruzaaro rukaija buzima nk'oku kyabaire kishuurwirwe. Halleluya. Kyo reeba eki entumwa z'ebishuba ezo zaabaire nizekora. Zikaijana ekigambo kyazo. Abaefeso abo bakaba nibamanya ekyo Kigambo nk'oku Paulo yaabaire akyegeise. Bakaba baijwire Omwoyo Orikwera ahabwa Paulo kubataho engaro. Bakareeba ezo ntumwa z'ebishuba omu maisho baagira bati, "Timurikugamba nk'ebi Paulo yaagambire. N'ahabw'ekyo, muri abanyabishuba." Oo, ekyo nikihemba omuriro omu mutima gwangye. Garuka aha Kigambo! Buzima tiiwe orikugyeza entumwa, na nabi kandi n'omwegyesa, N'EKIGAMBO EKIRIKUBAGYEZA. Kimwe omu biro ebi nihaija kwija Nabi aha Busingye bw'Ekanisa ya Laodikia kandi nimwija kumanya ku araabe ari ogwo buzima otumirwe kuruga ahari Ruhanga nari yaaba atariwe. Eego nimwija kukimanya, ahakuba ku araabe ari owa Ruhanga NAIJA KUBA ARI OMURI EKYO KIGAMBO BUZIMA NK'OKU RUHANGA YAAKIHAIRE PAULO. TARIKWIIJA KUTEISHUKA AKARUGA AHARI EKYO KIGAMBO N'AKAANYA KAKYE, N'OBU KAAKUBA AKATOONYEZI KAMWE. Omu busingye obwo obw'aha muheru, obu harikwija kubaho baanabi b'ebishuba baingi, reeba kandi oyetegereze oku barikwija kuguma nibakugambira ngu waaba otabaikiriize n'ebi barikugamba, noiya kubura; kwonka NABI ogwo OW'EBIRO BY'AHA MUHERU ku arireebeka, ku araabe ari nabi ogwo buzima, naija kuba naagambira ahaiguru ati, "Garuka aha Kigambo kitari ekyo noobura." Tarikwija kwombekyera aha kushuuruurirwa kwe wenka nari okuvunuura kwe wenka kureka aha Kigambo. Amiina, kandi Amiina!

Ezi ntumwa z'ebishuba n'emishaga eshuugire ei Paulo yaagambireho. Akagira ati, "Ku ndiba naagyenzire baryagezaho kwija bagire ngu baine okushuuruurirwa okurikwingana n'okwangye; kwonka ekigyendererwa kyabo tikuri kubahwera, kureka okubacwekyereza." Ebyakozirwe 20:27-32, "Ahakuba tindatiinire kubagambira naama yona eya Ruhanga. Imwe mwerinde, kandi murinde n'obusyo bwona obu Omwoyo Orikwera yaabakwatsize kuba abareeberezi baabwo, okuriisa ekanisa ya Ruhanga ei Yaayeguriire n'eshagama Ye. Nimanya ngu, ku ndiheza kubarugaho, emishaga eshuugire eryabataahirira, terisaasira busyo; kandi

n'omuriimwe haryarugamu abantu, abarikugamba eby'obuhabe, niboosya abeegi ngu babakurate. N'ahabw'ekyo mugume nimureeba, kandi mwijukye ku ntararekire kuhana muntu weena n'amarira, okumara emyaka eshatu ny'omushana na ny'ekiro. Kandi na hati mbwenu, B'eishe-emwe, nimbatsigira Ruhanga n'Ekigambo ky'embabazi Ze, ekirikubaasa kubombeka n'okubaha obuhunguzi hamwe na boona abeeziibwe.”

Yohaana, nawe, akabamanyanya ahakuba akagira omuri 1 Yohaana 4:1 ati, “. . . ahakuba baanabi baingi ab'ebishuba baizire (baaherize kwija) omu nsi.” Ogwo mwoyo gwa antikristo gukaba gwatandikire kushenshera omu kanisa, kandi gukaba nigukikora omu kuhakanisa Ekigambo. Noomanya, aha niho byona byatandikiire. Hanu hanu omu busingye bw'ekanisa y'okubanza. Bakaba baatandikire kwehakana Ekigambo nibataho enyikiriza z'amadiini gaabo g'obwengye bw'abeegire omu mwanya gw'Ekigambo. Ogwo ni antikristo, ahakuba Yesu n'Ekigambo. Kuhakanisa Ekigambo nikwo kuhakanisa Yesu. Kuhakanisa Ekigambo nikwo kuba antikristo, ahabw'okuba Omwoyo n'Ekigambo ni KIMWE. Waaba orikuhakanisa Ekigambo, noiya kuba ori antikristo. KANDI KU GURAABE GWATANDIKIIRE OMU KANISA Y'OKUBANZA NIGWIJA KUKURA KUHITSYA AHA MUHERU OBU GURAATEGYEKYE. Kandi ekyo buzima nikyo orikwija kureeba twaba nituraba omu busingye bwona. Nigutandika guri mukye omu Busingye bwa Efeso gugumizamu nigukura omuri buri busingye kuhitsya obu okuhakanisa Ekigambo, entwaza ya antikristo eraategyekyere kimwe kandi Ekigambo ekitashobya nikyangirwa kimwe n'entumwa z'ebishuba z'omu kanisa y'ebishuba.

Hati kyanguhi kwetegyereza kubi ebi turikugambaho ahabw'okuba eki ninkihamisiriza munonga. Noobaasa kukihurira oshushe oti omwoyo gwa antikristo, ogurikuhakanisa Ekigambo, n'okwangira kimwe Ekigambo, kuhakanisa Baiburi gukahenderera omu kukyanga. Ngaaha sebo. Tikyo ekyo. Eki kiri, n'Okushuuruurwa 22:18,19, “Niinyehanangiriza omuntu weena orikuhurira ebigambo by'omu kitabo eki, nti: Omuntu weena ku aribyongeraho, Ruhanga aryamwongeraho ebibonaboneso ebihandiikirwe omu kitabo eki; kandi omuntu weena ku aricwa aha bigambo eby'omu kitabo ky'obunabi obu, Ruhanga aryamwaka omugabo gwe (ogw'omu Kitabo ky'Amagara) n'ogw'omu rurembo orurikwera, ebihandiikirwe omu kitabo eki.” N'okuhinduraho n'obu kyakuba ekigambo KIMWE orikucwaho nari orikwongeraho. N'akakoryo ka Sitaane aka ira ak'omu Kibanja kya Edeni. Akafa kwongeraho ekigambo kikye aha bi Ruhanga yaabaire agambire. Ekyo kikakikora. Kikareeta okufa n'okucwekyerera. Kandi n'omuri Efeso, nikwo kyabaire. Ekigambo kimwe kyonka ekyayongyeirweho, ekigambo kimwe kyonka ekyacwirweho, reero omwoyo gwa antikristo, ogurikuhakanisa Ekigambo gwatandika kukura n'amaani.

Waakitunga hati? Nzizo empasha ezo ogundi murundi. Ngigyo emiti ebiri egyo ogundi murundi, gumwe nigukurira aha rubaju rw'ogundi omu itaka rimwe, neetunga ebiriisa ebirikushushana, enjura erikushushana, kandi neejwerwa omushana gumwe. Kwonka ekaruga omu mbibo ZITARIKUSHUSHANA. Omuti gumwe n'OGW'Ekigambo kya Ruhanga, buzima nk'oku Ruhanga yaakihaire, gukikunda kandi gukyorobera. Omuti ogundi guruga omu mbibo erikuhakanisa Ekigambo kya Ruhanga kandi gukihindura ahu gurikwenda ngu kihindukye. Guta enyegyesa n'ebigunjano byagwo omu mwanya gw'Ekigambo ekihuriire ky'amazima nk'oku Kaini yaakozire buzima, owaahendeire naita Abeeli. Kwonka mutatiina imwe obusyo bukye. Mugume n'Ekigambo. Mute ekyo Kigambo ahagati yaanyu na Sitaane. Haawa tarakozire ekyo atyo yaaremwa. N'ekanisa ku eta Ekigambo ahansi etaaha omu omwirima ndindindi gwa Sitaane.

“Nimmanya ku ogumisiriza, kandi ku oyemera bingi ahabw'Eiziina Ryangye, kandi ku otakaruhaga.” Eki nikyenda kushushana nk'oku kigambirweho omu mushororongu gwa 2. Kwonka omu mushororongu gwa 2 emirimo, okwezirika, n'okugumisiriza bikaba nibiruga omu kurinda Ekigambo ekirikwera ekyabakwatsiibwe. Ka baakumiriire hare abazigu. Ka baabaire bari eky'okwesiimisa ahari Paulo. Kwonka omu mushororongu ogu okuhiiganisibwa kwabo n'okugyezibwa kandi n'okugumisiriza biriho ahabw'Eiziina rya Yesu erihairwe omugisha.

Noomanya ekyo n'ekya buriijo, ahakuba n'Ekigambo kandi n'Eiziina ebirikutuma omuzigu yaatweshukaho nk'omwegyemure. Ekyo Kigambo ky'obushoborozi bwingi ekyayorekirwe omu kutamba, n'obumanyiso, n'eb'okutangaaza n'ebindi by'okureeberaho, bikareetera Abafarisaayo kugambira ahaiguru ngu abarikwikiriza b'amazima baitwe. Kandi na hati eryo Iziina, eryayangirwe rikagaywa Abayudaaya, ririyo nirishekyerera abeegire nk'oku baashekire ahabw'okuteekateeka ngu omuntu weena akaaba omushema kwikiririza omu muntu owaafiire kandi akagaruka akazooka mbwenu hati ashutami omu iguru. N'ahabw'ekyo hanu hakaba hariho abanyadiini abarikuhiiganisa, Abayudaaya, nibakyeena Yesu ugu, aharibo Owaabaire ari Mesia ow'ebishuba; kandi hanu hakaba hariho abandi abarikusheka baine okushemererwa kandi barikumuteerera enaku nibarengyeza Iziina rya ruhanga musya, Ou aharibo yaabaire atari ruhanga na kanye.

Hati hanu hariho ekindi kintu ekyatandikire omu busingye obwo kandi nikiza kugumizamu omuri buri busingye, nikyeyongyera kuhama n'okuba omwirima munonga. Nikyo eki, abantu bakaba nibangira kimwe kugira akakwate n'Eiziina eryo. Ekaba etari Kanisa ya Efeso y'amazima eyaabaire neekikora. Ngaaha sebo. Zikaba ziri entumwa z'ebishuba. Bakaba bari ab'aheru abaabaire nibagezaho kutaahamu ngu bashiishe abaikiriza. Abaefeso bakaba nibamanyanya Eiziina eryo kandi barikurikunda. Ijuka obukomooko bw'Ekanisa ya Efeso. Akabiina k'abantu bakye abaabaire bategyereze Mesia bakahurira ngu nabi owaabaire naayeyeta orikubandiza ogwo Mesia akaba arebekire omu ihamba rya Palesitaini kandi akaba naabatiza abantu okubatiza kw'okweteisa ebibi. Aba, mbwenu, nibo baayakiire okubatiza kwa Yohaana. Kwonka Paulo ku yaabahikireho akabooreka ku nabi ogwo yaafiire, kandi ku Yesu yaizire kandi akahikiiriza amagara Ge nk'ekitambo ahabw'ekibi, kandi ngu HATI Omwoyo Orikwera akaba aizire kandi akaba naaza kutaahamu kwijuzabaikiriza b'amazima omuri Yesu boona, Mesia ogwo. Ku baahuriire

eki, BAABATIZIBWA OMU IZIINA RYA MUKAMA YESU, kandi Paulo ku yaabataireho engaro, boona bajjura Omwoyo Orikwera. Bakaba nibamanya eki kiri okworobera Ekigambo, kubatizibwa omu Iziina Rye (Mukama Yesu Kristo) kandi omu buryo obwo baamanya ku nibaija kwijura Omwoyo Orikwera. Okaba otarikubaasa kuhindura abantu abo. Bakaba nibamanya amazima. Ebyakozirwe 19:1-7.

Bakaba nibamanya amaani g'Eiziina eryo. Bakareeba Eiziina eryo ku ryabaire riri ery'amaani maingi kuhitsya obu emyenda eyaarugire aha mubiri gwa Paulo ekooherezibwa omu Iziina rya Yesu aha bantu abarikubonabona ekaba neebaasa kukiza abarwaire kubaiha omu ndwara z'emiringo mingi n'okubinga emyoyo mibi. Okwo nikwo Eiziina eryo ryakozire omu kweyoreka okurikutangaaza munonga okuhitsya obu Abayudaaya abatarikusiiimwa omuri Efeso baagyerizeho kurikoresa kubinga baadaimooni. Ebyakozirwe 19:11-17, "Ruhanga yaakoresa emikono ya Paulo eby'okutangaaza ebitari by'obutoosha; kandi ebitambaara n'emyenda ebyarugire aha mubiri gwe baabitwarira abarwaire, baakira endwara zaabo, n'abariho baadaimoni baabarugaho. Hakaba hariho ebizengyerezi by'Abayudaaya, abatsiriki b'emizimu baayehanga kutsirika baadaimoni omu Iziina rya Mukama waitu Yesu, nibagira bati: Ninkwitsa Yesu ou Paulo agamba. Hakaba hariho abashaija mushanju, batabani ba Skewa Omuyudaaya, omunyamurwa omukuru, abaabaire nibakora batyo. Daimoni yaabagarukamu ati: Yesu nimmumanya, na Paulo nimmumanya; beitu imwe muri baahi? Omushaija owaabaire ariho daimoni yaabagurukira boona, yaabakiza amaani, yaababinga, baahunga omu nju egyo bajwaire busha, bahutaire. Kandi ekyo kyamanywa boona, Abayudaaya n'Abagriika, abaabaire batwire Efeso; boona baatiina munonga, kandi Eiziina rya Mukama waitu Yesu ryahimbisibwa."

Bakaba nibamanya amagara agahikiriire agaabaire nigakuratira okugira Eiziina eryo, ahakuba weena orikugamba Eiziina rya Mukama, arugye omu bibi. Mube abarikwera, imwe nyabya za Mukama. Otariizaanisa Eiziina rya Mukama Ruhanga waawe. Abaefeso aba bakaba bari ABAKRISTAAYO. Bakaba baine Eiziina, kandi Eiziina eryo akaba ari Kristo, Owaabaire ari Omwoyo wa Ruhanga omuribo, kandi Eryabaire riri rimwe aha Maziina g'enjabushatu ga Mukama waabo.

"Kandi ku oyemera bingi ahabw'Eiziina Ryangye, kandi ku otakaruhaga." Abaikiriza aba bakaba batarikwezirika ahabwa Paulo, nari ahabw'ekibiina ky'ediini. Bakaba batarikwehayo ahari zaapuroguraamu hamwe n'amatendekyero ahu bombekire ebintu eby'omuhendo. Bakaba nibakorera Mukama. Bakaba bari abaheereza Be, bakaba batarikukoresibwa n'ebibiina by'amadiini. Bakaba bataza aha kanisa aha izooba rya Sande bakagamba aha Iziina eryo reero bakaryebwa ebiro by'egyo saabiiti yona. Bakaba batagamba Eiziina eryo aha munwa kwonka. Ngaaha sebo. Bakaba bahaireyo amagara gaabo.

Ebi baakozire byona bakabikora omu Iziina eryo. Bakaba bakorera omu Iziina, kwonka ku baabaire baba batarikubaasa kukorera omu Iziina eryo, bakaba bareka kukora. Aba n'Abakristaayo abaabaire batairwe omu myanya y'omu iguru abu engyesho zaabo zaabaire ziri omuri Mukama.

Kwonka ekibiina ekyo ky'omuzaabibu gw'ebishuba ekyabaire nikyenda kushiisha Eiziina eryo bakaguma bari nk'emishaga eyesherekire omu mwirima, etegyereze kutaahamu n'okutanyagura. Kwonka abarikwera bakagumisiririza okugyezibwa kandi baarinda Ekigambo n'eryo Iziina.

OKWETOMBOITA KWA RUHANGA

Okushuuruurwa 2:4, "Kwonka nyine eki ndikufa naiwe; okareka okukunda kwawe okw'okubanza." Okwetegyereza eki nooteekwa kumanya ngu Omwoyo tarikugambira abarikwera abaabandize aba Efeso bonka. Obutumwa obu n'obw'obusingye bwona obwamazire nk'emyaka 120. Obutumwa bwabo, na mbwenu, n'obw'obusingye bwona omu bwire obwo. Hati ebyafaayo biguma nibyegarukamu. Omu busingye bwa Israeli nitureeba okusisiimuka omu busingye bumwe, kandi tureeba omuriro gw'okusisiimuka okwo nigukyendeera omu busingye oburikukurataho. Omu busingye bwa kashatu, amakara nigabaasa kuba nigaaka mpora, kwonka omu bwa kana nihabaasa kuba hatakiriho kamanyiso koono ak'omuriro ogwo ogwabandize. Bwanyima Ruhanga agaruka ahemba omuriro, kandi enkora niyo emwe egarukwamu. Buzima n'okworeka ku Ruhanga atagira baijukuru. Okujunwa tikurikurabira omu kuzaarwa kw'obutoosha nk'oku hatariho mazima goona aha kuhungurirana kw'entumwa. Tikiri omu Kigambo. Nootandika n'abaikiriza b'amazima abazairwe obwa kabiri, kandi obusingye oburikukurataho ku bwija baba batakiriki Bakristaayo b'amazima, kureka batwaire eiziina ry'ekigombe ky'ediini kandi hati n'Ababaputisiti, Abametsodisiti, n'agandi. Ekyo nikyo bari buzima. Ti Bakristaayo. Nootekwa kuzaarwa ahabw'okukunda kwa Ruhanga, kutari kukunda kw'omuntu kugira ngu ojunwe. Kwonka abantu aba nibeeteerana hamwe hati ahabw'okukunda kw'omuntu. Tindikugira ngu bamwe omuribo tibari gye na Ruhanga. Tihariho dakiika n'emwe ei ndikugamba ntyo, kwonka omuriro ogw'okubanza guraira. Tibakiri nk'obunyakare.

Okwetenga munonga kushemeza Ruhanga, okukunda kumanya Ekigambo, ekyetengo ky'okwenda kutaaha omu Mwoyo, byona bitandika kukyendeera kandi omu mwanya gw'ekanisa egyo kugira omuriro haza omuriro gwa Ruhanga efuka etyo ehinduka ey'emikoro. Ekyo nikwo kyabaire obwire obwo aha Baefeso. Bakaba batandikire mpora kuba ab'emikoro. Okweheerayo kimwe ahari Ruhanga kukaba nikukyendeera kandi abantu bakaba batarikwegyendesereza munonga aha ki Ruhanga yaabaire naabateekateekaho kureka bakatandika kwegyendesereza aha ki ensi yaabaire neebateekateekaho. Obwo busingye bwa kabiri obwakuratsireho bukaba buri nk'Abaisraeli. Bakashabisa amaani omugabe kuba nk'agandi mahanga. Ku baakozire ekyo, baahigika

Ruhanga. Kwonka nabwo bakakikora. Ebyo nibyo byafaayo by'ekansa. Ekanisa ku eteekateekyera omu kwenda kushushana n'ensi omu mwanya gw'okushushana na Ruhanga, tikirikutwara obwire buraingwa otakabareebire nibareka kukora ebintu ebi baabaire nibakora, bakatandika kukora ebintu ebi baabaire batarikubaasa kukora omu kubanza. Bahindura aha mijwarire yaabo, aha mitwarize yaabo kandi n'engyesho zaabo. Barekyera aho kufayo. Ekyo nikyo "Efeso" kirikumanyisa: binkwatiireki - kuteishuka aha kigyendererwa.

Ogwo mwetoororo gw'okusisiimuka n'okufa tigukarekaga. Eki orikuteekwa kukora n'okwijuka enkora ya Ruhanga egi omu Mwoyo ehereerukire obu abashaija n'abakazi baabaire bajwara nk'Abakristaayo, bakaza aha kanisa, bakashaba ekiro kyona, bakaza omu nshonda z'obwekubo kandi okweyoreka kw'Omwoyo kutabakwatse nshoni. Bakatsigaho amakanisa gaabo ga kare agafiire baaramiza omu maka nari omu byombeko bya sitooha ebikuzire. Bakaba baine ekintu ekirikyo. Kwonka tikiratwairwa bwire buraingwa baatandika kutunga esente ezirikumara kwombeka amakanisa masya marungi. Baatamu kwaya omu mwanya gw'okweshongorera Ruhanga bo bonka. Baajweka kwaya amaganduura. Baatebeekanisa enkora erikwebemberwa omuntu. Ahonaaho baatandika kushoma ebitabo ebyabaire bitashemereire kushomwa. Baihaho emihingo reero embuzi zaataahamu zaategyeka. Akaari k'okushemererwa kakaba katakirimu. Obugabe bw'Omwoyo bwarugamu. Oo, bakagumizamu n'emigyenzo; kwonka omuriro gukaba gwairwa kandi okwiragura kw'eiju rya kashenda nikwo kuri nk'okutsigaireho.

Akaanya kakye akaahingura naagira ngu Yohaana akaba naayetegyereza eki kyabaire kiri okukunda Ruhanga. Egyo ntumwa nkuru ya rukundo ekaba buzima neekireeba obu ekanisa yaatandika kutsigaho egyo rukundo ya Ruhanga y'okubanza. Omuri 1 Yohaana 5:3, naagira ati, "Ahakuba oku nikwo kukunda (kwa) Ruhanga, itwe okworobera ebiragiro Bye (Ekigambo Kye)." Okuteishuka kakye kuruga aha Kigambo ekyo ekaba eri entambo y'okuruga ahari Kristo. Abantu nibagira ngu nibakunda Ruhanga, baza aha kanisa, nangwa obundi bateera orwari beesiima kandi beeshongora baza omu maani bakyamuka. Kwonka ebyo byona ku bihwaho, yetegyereze oreebe ku baraabe bari omu KIGAMBO ekyo, nibakigyenderamu, batwire amagara gaakyo. Ku baraabe nibaraba omuri biriya byona kwonka batagyendere omu Kigambo ekyo, nibabaasa kugamba ngu nibakunda Ruhanga kwonka amagara gaabo nigagamba ekindi. Niinyebuza yaaba Yohaana atarareebire nk'ebyo bingi atakafiire; abantu kugira ngu bakaba nibakunda Ruhanga kwonka batarikworobera Ekigambo Kye. Oo, Ekanisa ya Efeso, hariho ekirikukubaho. Hariho omuntu orikugyezaho kwongyera aha Kigambo ekyo nari kukicwaho. Kwonka nibabikora n'obwengye kuhitsya obu otarikubaasa kukireeba. Tibakataireho nkora mpango munonga kuhitsya obu orikubaasa kugireeba aheeru okwo. Esherekirwe, kandi nibakireeta omu muringo gw'okukihanuuraho n'okwetegyereza kw'obuntu kandi nikijja kusingura ku muraabe mutakyangire. Garukayo ahari Pentekoote obwire butakahweire!

Kwonka nka burijjo abantu tibata mutima aha kuhabura kwa Ruhanga. Omuriro ogwo ogw'okusisiimuka ogwombekirwe aha Kigambo ekirikwera n'ogw'okutangaaza munonga, kandi n'okweyoreka kw'Omwoyo kuhairwe omugisha munonga, kuhitsya obu obwoba bukye bushensheramu kandi okuhwehura omu mutima kukagira kuti, "Nitubaasa tuta kurinda amazima aga agu twine? Nitubaasa kukora ki kureeba ngu okusisiimuka oku kwagumizamu?" Obwo nibwo "omwoyo wa antikristo" ataahamu akahwehura ati, "Reeba, oine amazima hati, reeba ngu tigaakuburaho. Yetebeekanise oteho enyikiriza y'eby'orikwikiriza. Byona obite omu kitabo ky'enyikiriza z'ekansa." Batyo bakikora. Bakora ekibiina ky'ediini. Bongyera aha Kigambo. Reero bafa nka Haawa ahabw'okukwata ekigambo Kimwe ekigwire. Ekigambo kya Ruhanga nikyo kireeta amagara. Kandi tikiri eki turikugamba aha Kigambo ekiine omugasho, kureka eki Ruhanga yaagambire.

OKUHABURA KWA RUHANGA

Okushuuruurwa 2:5, "N'ahabw'ekyo oijukye ahu waihire waaza kugwa, oyeteise, ogarukye okore nk'oku waabaire nookora okubanza. Ku oraabe otakozire otyo, Ndyaija ahariwe, nyihe ekikondo ky'etabaaza yaawe omu mwanya gwakyo, ku oriba oteeteisize."

Ruhanga naabagambira KWIJUKA. Nikireebekyera kimwe ku haine ekyabaire kirugire omu biteekateeko byabo. Hariho eki baabaire beebirwe. Akabagambira ngu bahindukye omu biteekateeko byabo bagarukye ahu baatandikiire. Okutandika kw'obusingye bw'okubanza ekaba eri Pentekoote. Bakaba bagwire bagirugireho. Bakaba beebirwe ekitiinisa n'eby'okutangaaza bya Pentekoote. Bukaba buri obwire bw'okugarukayo omu biteekateeko byabo reero bakaza omu biriho. Garuka omu bwire obu baabaire nibabaasa kugira bati, "Ahariinye okugumaho ni Kristo." Garuka aha kushemera obu Anania na Safira baakorwaho. Garuka aha Irempo Erirungi. Oo, ka n'eky'enshoni kuteishuka ahari Ruhanga okashagika ebyo bikorwa ebirikushiisha Eziina Rye. Abo boona abarikugamba Eziina Rye barugye omu kibi kandi barinde enyabya zaabo zigume zishemeire ahabwa Ruhanga. Reeba eki waabaire ori omu mutima gwawe, n'omu biteekateeko, kandi n'omu magara gaawe. Bwanyima obe nikyo waagarukira.

Beitu omuhanda gw'okugarukayo ni guuha? Omuhanda ogwo n'omuhanda gw'okweteisa. Omusiisi ku araabe ari ow'okwija ahari Ruhanga kurabira omu kweteisa n'ahabw'ekyo ogwo ori kooyakooya nari ogarukire enyima naija kweteisa atyo n'okukiraho. Yeteise! Yana ebyana ebishemereire abeteisize. Okihamywe n'amagara gaawe. "Waaba oteeteisize," nikwo Ruhanga arikugira, "Niinyija kukwihaho ekikondo ky'etabaaza yaawe." Buzima. Ekanisa eri omu mbeera egyo terikubaasa kuha ensi omushana. Omushana gwayo guhindukire omwirima. Mbweni Ruhanga naija kugiihaho entumwa yaayo erikwesigwa, n'abariisa baayo abeesigwa kandi abatsigyeho

bonka, kandi nibaija kugumizamu nibagamba aha Bukristaayo kwonka batsigirweho.

Yeteise juba! Oteeziringa! Nikireebekyera kimwe Efeso ekeeziringa, ahakuba obwire bwayo tiburabaire buraingw. Ekitiinisa kya Ruhanga kikakyendeera jubajuba. Tikiratwaire bwire buraingw orurembo rwaba amatongo. Hekalu jaarwo ey'ekitiinisa ekaba entuumo etaine oku erikushusha. Ensi egyo yaaba ekisharara yaaturwamu ebinyonyi eby'omu maizi; abantu baahwamu kureka abatarikwikiriza bakye omu kyaro ky'amatongo. Tiharatsigairemu Mukristaayo n'OMWE. Etabaaza ekaihwa omu mwanya gwayo.

Hati tikirikumanyisa ngu ekaba etarikubaasa kweteisa. Tikirikumanyisa ngu titurikubaasa kweteisa. Nitubaasa. Kwonka nikiteekwa kuba ahonaaho. Nikiteekwa kuba okutakira Ruhanga n'omutima gw'amazima omu busaasi, reero Ruhanga atugarure busya. Ekitiinisa nikiza kugaruka.

EMBIBO Y'OBUNIKOLAITI

Okushuuruurwa 2:6, “Kwonka eki oine, oyanga ebi Abanikolaiti bakora, Naanye ebi nyanga.”

Hati hariho ebiteekateeko bibiri aha ki Abanikolaiti baabaire bari. Bamwe nibagira ngu bakaba bari ekibiina eky'abaarugire omu diini yaabo baine owaagitandikireho, Nicholas owa Antiokia, owaahindukire kuruga omu diini ye, akaba omwe aha badiikoni mushanju omuri Yerusaalemu. Bakaba bagira amagyenye g'ekipagaani kandi bakaba bari abarikukirayo okutashemera omu ngyesho zaabo. Bakaba beegyesa ngu okwenda kusingura eby'obunyamubiri omuntu akaba naateekwa kubanza yaabikora byona akabona kubimanya. Omu mazima bakeeherayo kimwe aha bunyamubiri obwo kuhitsya obu ekitiinisa kyabo kyahwereireho kimwe. N'ahabw'ekyo bakaba babahaire amaziina abiri g'omu Ndagaano eya Ira okushushanisa eby'obushema ebyo: erya Balamu n'erya Yezebeeli. Nk'oku Balamu yaasiisire abantu atyo akabasingura, nikigambwa ngu Nicholas nawe nikwo yaakozire. Nikiikirizibwa ku ekibiina ky'abantu eki kyagyemirwe okuruga omuri Efeso bwanyima kikatunga omwanya gw'okutuuruamu omuri Perugamo.

Kwonka ekibuuzo ekiri aha nyikiriza egi kiri ngu teri y'amazima. Tihariho kyafaayo na kimwe eky'enyikiriza egi. Nikibaasikira kimwe ku eri ekigunjano. Okutwara enteekateeka egyo nooba waahinduramu obusingye bw'ekanisa ya Efeso ebyafaayo byonka ebaine eky'okwegyesa ab'ebiro ebi. Eki ti ky'amazima, ahakuba ekirikutandika kyona omu kanisa eyaabandize nikiteekwa kugumizamu omu busingye bwona okuhitsya obu kirikuheebwa omugisha aha muheru kandi kikatunguuruwa Ruhanga nari kicacwekyerezebwa nk'ekintu ekitashemeire omu nyanja y'omuriro. Okworeka ku ekigunjano eki kirikuhakanisiza kimwe Ebyahandiikirwe, fa kureeba omu Kushuuruurwa 2:2, Ekanisa ya Efeso ekaba ETARIKUBAASA KUGUMISIRIZA ababi. N'ahabw'ekyo bakaba nibateekwa kubashohoza aheeru, kitari ekyo tikyakugizire makuru kugira ngu bakaba batarikubaasa kubagumisiririza. Ku baraabe batarabashohoze aheeru, obwo bakaba nibabagumisiriza. Hati omu mushorongo gwa mukaaga, nikigira ngu bakaba nibanga ebikorwa byabo. N'ahabw'ekyo ekibiina eki ky'Abanikolaiti kikaguma kiri ekicweka ky'obusingye bw'okubanza, nikikora ebikorwa byakyo. Ebikorwa bikangwa, kwonka abantu tibaraziibirwe kubikora. Mbweni nitureeba embibo omuri Efeso ezirikwija kugumizamu kandi zikaija kuba enyegyesa erikwija kugumizamu kuhikira kimwe, n'okutaahira kimwe omu, nyanja y'omuriro.

Abanikolaiti aba ni baahi? Ekigambo eki nikiruga omu bigambo bibiri by'Orugriika. Nikao, ekirikumanyisa okusingura, na Laos, ekirikumanyisa abakuratsi. Amazima agarikweyoreka, hariho omuntu owaabaire naakora ekintu omuri egyo kanisa y'okubanza ekyabaire nikisingura abakuratsi. Abakuratsi ku baraabe baabaire nibasingurwa, obwo nibuteekwa kuba bwabaire buri “obushoboorozi” okwo oburikukikora.

Ni kintu ki eki Ruhanga yaayangire ekyabaire nikibaho omu kanisa egyo? Ekyabaire nikigyenda omu maisho obwo, kandi na hati nikikigyenda omu maisho, nikyo buzima eki ekigambo Nikolaiti kirikumanyisa. Abantu bakaba nibategyekwa omu muringo ogwabaire guteishukiire kimwe aha Kigambo kya Ruhanga.

Hati kutunga amakuru agahikire ag'eki turi haihi kutaahamu, ninteekwa kubahabura kugumya omu biteekateeko ngu ediini egyo (ebintu by'omwoyo waaba nooyenda), ekozirwe ebicweka bibiri ebirabainemu kwonka bitarikushushana nk'erangi erikwiragura n'erikwera. Ediini kandi n'ensi y'omwoyo bikozirwe egyo miti ebiri eyaabaire eine emizi yaayo omuri Edeni. Omuti gw'Amagara n'Omuti gw'Okumanya Oburungi n'Obubi yombi ekaba eyemereire ahagati y'ekibanja kandi buzima amataagi gaayo gakaba garabainemu. Mbweni omu Kanisa ya Efeso namwo harimu ekigumire munonga kushoboorora ekyo. Ekanisa ekozirwe abarungi n'ababi. Emizaabibu ebiri niyo ekora ekanisa. Emizaabibu egi eri nk'oburo n'enkyenzi, birikukurira hamwe. Kwonka gumwe n'ogw'AMAZIMA. Ogundi n'ogw'EBISHUBA. Hati Ruhanga naija KUGAMBIRA buri gumwe kandi agambe AHARI buri gumwe. Naija kugyeta ekanisa. Kandi entoore zonka nizo zirikwija kumanya kurungi Omwoyo w'amazima. Entoore zonka nizo zitarikwija kuhabisibwa. Matayo 24:24, “Ahakuba haryaimuka abarikweyeta Kristo na baanabi b'ebishuba, baryakora obumanyiso bukuru n'eb'okutangaaza, babone kuhabisa n'entoore, kyaba nikibasika.” N'ahabw'ekyo obwire obwo omu kanisa eya ira (obwire bukye munonga ahanyima ya Pentekoote) omuzaabibu gw'ebishuba gukeeshobekanisa aha Muzaabibu gw'Amazima kandi aho niho turikushanga ebikorwa by'Abanikolaiti ebi. Kandi omwoyo ogwo niguza kushangwa nigurwanisa Omuzabibu gw'Amazima kuhitsya obu Ruhanga araaguhwerekyereze. Hati waakitunga?

Kare. Hati embeera y'eby'omwoyo omu kanisa egyo ekaba eri eta? Ekaba erugire aha kukunda kwayo okw'okubanza. Okuruga aha kukunda kwayo okw'okubanza kw'Ekigambo kya Ruhanga kikatushuuruurirwa

nk'eyaabaire egwire kuruga aha kutandika kwayo, eyaabaire eri Pentekoote. Omu rurimi orwanguhi, ekyo nikimanyisa ngu ekanisa egi ekaba eri omu kabi k'okwihwa aha bwebembezi bw'Omwoyo Orikwera, okutegeyeka Omwoyo. Eki nikyo buzima ekyabaireho ahanyima ya Musa kwebembera Abaisraeli okuruga Misri. Omuhanda gwa Ruhanga gukaba guri okubeebembera n'ekicu ky'omuriro, okugamba kwa nabi, eby'amahano n'obumanyiso, kandi n'ebyo okutangaaza ebihairwe Ruhanga. Eki kikaba nikijja kuhikiirizibwa abashaija “abatoorainwe Ruhanga,” “abeemekirwe Ruhanga,” “abakwatsiibwe Ruhanga ebikwato,” kandi “abashaija abatumirwe Ruhanga,” obwo orusiisira rwonu nirutegeyeka enkora y'Omwoyo Orikwera. Bakagoma baayenda ebiragiro n'enyikiriza z'ediini z'okugyenderaho. Reero bwanyima baayenda omugabe. Batyo baayenda kushushanira kimwe n'ab'ensi kandi baataahira kimwe omu buhabe n'okwebera kimwe. Okwo nikwo buzima obusingye bw'ekanisa bw'okubanza bwatandikire, kandi ekanisa neiya kweyongyera kuba kubi kandi ebe mbi, kuhitsya obu Omwoyo Orikwera ariyagirwa kimwe atyo Ruhanga akateekwa kuhwerekyereza abantu.

Reeba oku kyatandikire omu kanisa eya ira. Kikaba nikyetwa ebikorwa. Bwanyima kyaba enyegyesa. Kyaba engyenderwaho. Kyaba omuhanda oguhamire. Kyahereeruka nikitegyeka reero Ruhanga yaateebwa aha rubaju. Oo, kikatandika kiri kikyeye munonga, kicureire munonga, kitainiire kimwe nshonga. Kikareebeka kiri kirungi munonga. Kyareebeka nk'eky'obwengye. Bwanyima kyahama, kandi nk'oruziramire, kyaniga kyamaramu omwitsyo omu kanisa kandi kyaita byona eby'omwoyo ebyabaire bigirimu. Yeiwe, omuzaabibu gw'ebishuba ogwo gwine obwengye bwingi. Guri nka maraika w'omushana okuhitsya obu gukukwata. Hati niinyenda kugamba nti niinyikiriza omu bwebembezi. Kwonka ti bwebembezi bw'abantu obu ndikwikirizamu. Niinyikiriza omu bwebembezi bw'Omwoyo Orikwera kurabira omu Kigambo. Niinyikiriza nabwo, ku Ruhanga ataire abashaija omu kanisa, abashaija abaine ebiconco by'Omwoyo; nibaija kurindira ekanisa omu buteeka. Ekyo ninkikiriza. Niinyikiriza nabwo ku ekanisa etegeyeka abashaija abu Ruhanga atuma kugireeberera. Kwonka obutegeyeki obu N'OBW'EKIGAMBO, n'ahabw'ekyo abo ti bashaija buzima abarikutegeyeka kureka OMWOYO WA RUHANGA, ahakuba Ekigambo n'Omwoyo ni KIMWE. Abaheburaayo 13:7, “Mwijukye abeebembezi baanyu, abaabagambiire Ekigambo kya Ruhanga; mwetegyereze omuheru gw'amagara gaabo, mutooreze okwikiriza kwabo.”

Kwonka reeba ekyabaire kibaho obwire obwo. Ogwo muzaabibu gw'ebishuba gukaba gwatandikire kuhama kandi gukaba nigwegyesa ngu kikaba kihikire kutegyekwa abantu. Gukeegyesa ngu ekanisa ekaba neeteekwa kutegyekwa. Gwayegyesa kutegyeka abantu, kwonka omu mwanya gw'okukikora omu buryo bwa Ruhanga, bakafa kutwara obushoboorozi batyo baata obushoboorozi bw'omwoyo bwona omu mikono yaabo reero baarugayo baine obunyamurwa oburikwera obu baataire ahagati ya Ruhanga n'abantu. Bakagarukira kimwe enyima omu nkora eya ira ey'obunyamurwa bwa Arooni. Baahinduka ba antikristo ahakuba bakaihaho obuteerani Bwe baagyemamu obwabo. Ekyo Ruhanga akakyanga. Abaefeso ekyo bakakyanga kandi n'omwikiriza w'amazima nawe naakyanga. Tukaaba tufeereire kimwe amaisho twaba tutareebire ekintu nikyo kimwe nikikora omu busingye bwona kandi obwa hati nikikirirayo kimwe obubi. Eki kyabaire kiri, kikaba kiri ekibiina ky'ediini. Ekyo kikashooro abantu. Abantu ba Ruhanga bashemereire kuba bamwe. Ahabw'Omwoyo OMWE BOONA babatizibwa kutaaha omu mubiri gumwe kandi BURI OMWE Omwoyo Orikwera naamwijaho kandi BURI OMWE naakwatanisa omu kuramya Ruhanga. Kwonka abantu bakakunda ebitiinisa, batyo baakwata obushoboorozi, reero baabishopu baahinduka ba acibishopu, kandi n'amaziina g'ebitiinisa by'okwetungura baahigika Ekigambo kya Ruhanga batyo baayegyesa enyegyesa zaabo ahabwabo. Bakareetera abantu kuboorobera kuhitsya obu obwire bwahikire obu omuringo gw'okuramya kwabo gwabaire gutarikushushana na kakye n'ogw'ebiro bya ira ahanyima ya Pentekoote. Ebikorwa ebi bikaba biri entandikiro y'okuhungurirana kw'entumwa. Okuruga aha kuhungurirana kw'entumwa, ekaba eri entambo emwe eyanguhi kandi eya juba y'okuhika aha kuba “mema w'ekanisa” nk'oburyo bw'embabazi ezirikujuna. Ekigambo kikagarurwa ahansi kuhika aha idara ry'enyikiriza y'ediini. Antikristo akaba naategyeka ekanisa kurabira omu mwoyo gwe.

Kireebe ebiro ebi. Waashoma Ebyakozirwe 2:4 omu muringo ogu bamwe bakishomamu, noobaasa kukishoma omu buryo obu, “Hati ekiro kya Pentekoote ku kyahikiire kimwe, hakaija omusaserdooti aine akagaati yaagira ati, 'Thayo orurimi rwawe,' reero yaata ako kagaati aha rurimi kwonka we yaanywa viinyo atyo yaagira ati, 'Hati waaheebwa Omwoyo Orikwera.’” Kigumire munonga kwikiriza? Ekyo buzima nikyo Obunikolaiti buhikireho. Nibagira ngu, “Otata Omutima aha ki Ekigambo kya Ruhanga kirikugamba. Torikubaasa kuyetegyereza. Nituteekwa kukibavunuurira. Ekindi Baiburi tekahweireyo. Neeteekwa kuhinduka n'obwire kandi nitwija kukugambira empinduka ezo.” Ekyo ka kitarikwikirizana n'Ekigambo kya Ruhanga ekirikuhamisiriza ngu, “Ka Ruhanga abe ow'amazima kwonka omuntu weena abe omunyabishuba,” obwire bwona ku habaho omuhondano n'amazima. Eiguru n'ensi biryahwaho, kwonka TIHARIHO EKIGAMBO NA KIMWE kya Ruhanga ekiriremwa. N'ahabw'ekyo abantu nibeebemberwa abantu abarikwetwaramu kuba eki batari. Nibagira ngu bariho omu mwanya gwa Kristo, kwonka eki bari ni antikristo.

Hanu hariho ekindi kintu ky'enaku. N'ekintu ekirikukwata aha kubatizibwa omu maizi. Omu biro bya Yesu n'ahanyima ya Pentekoote bakaba baibikwa omu maizi. Tihariho orikubaasa kuhakanisa ekyo. Abantu abegire bagira ngu eki baabaire bakora kukaba kuri okubashukaho amaizi ahabw'okuba kikaba kyanguhi kutunga otwina tukye oturimu amaizi omu myanya mingi. Kandi ku barikubashukaho amaizi, bakikora omu iziina rya Isheboona n'ery'Omwana n'ery'Omwoyo Orikwera, orikushusha oti ebyeterero by'amaziina ebyo n'amaziina gonyini, kandi orikushusha oti hariho Baaruhanga bashatu omu mwanya gw'omwe wenka. Kwonka guma omu kibiina ky'ediini ekyo haza ogyezeho kubuurira amazima g'okwibikwa omu Iziina rya Mukama Yesu Kristo noiya kushohozibwa. Torikubaasa kuba nooyebemberwa Ruhanga okagumamu. Tikirikubaasika.

Hati Paulo akaba ari nabi, owaayegyesiibwe Omwoyo Orikwera. Paulo ku araabe yaabatiize omu Iziina rya Mukama Yesu Kristo, kandi akagira ngu omuntu weena orikukora okundi okutari nk'okubuurira kwe akyeenirwe, n'ahabw'ekyo n'obwire bw'okusisiimuka okareeba ku ekanisa etakitegyekwa n'Omwoyo Orikwera kureka neetegyekwa Abanikolaiti. Ebyakozirwe 20:27-30, "Ahakuba tindatiinire kubagambira naama yoona eya Ruhanga. Imwe mwerinde, kandi murinde n'obusyo bwona obu Omwoyo Orikwera yaabakwatsize kuba abareberezi baabwo, okuriisa ekanisa ya Ruhanga ei Yaayeguriire n'eshagama Ye. Nimmanya ngu, ku ndiheza kubarugaho, emishega eshuugire eryabataahirira, terisaasira busyo; kandi n'omuriimwe haryarugamu abantu, abarikugamba eby'obuhabe, niboosya abeege ni ngu babakurate."

Paulo akakireeba nikijja. Kwonka akabahabura aha bunyamurwa obu obwine obwenge oburikuhabisa obwabaire nibwija kutegyeka n'enyegyesa zaabwo z'ebishuba. Akamanya ngu bakaba nibaza kuta omu nkora omuringo gw'okuramya ogwabaire gutarikwija kwikiriza abantu kwejumba omu buheereza bwona bw'Omwoyo Orikwera. Kandi nangwa n'eriizooba omuri abo abarikugamba ngu n'abarekwirwe kandi ngu baijwire Omwoyo tiharimu obugabe bwingi omu bakuratsi, kandi ekirikukirayo oburungi ekiturikubaasa kureeba n'ababuurizi bakye abarikubuurira bashukirweho Omwoyo obwo obusyo bushutami aho kwonka nibugyezaho kutaasyamu ebi bwayega. Eki kiri hare munonga na Paulo owaagambire ngu boona ku baabaire bateerana hamwe, boona bakaba baine okwebemberwa kw'Omwoyo, kandi boona bakaba beejumba omu kuramya kw'Omwoyo.

Kandi otwariire hamwe amakanisa g'amadiini goona tigakegaga ishomo eri omu Byahandiikirwe nari omu byafaayo. Obwire bwona Ruhanga ku aheereza orutaayaayo rw'Omwoyo Orikwera kandi abantu bakarekurwa, ahanyima y'akaanya kakye bagaruka beekomera omu kintu nikyo kimwe eki baarugiremu. Luteeri ku yaarugire omu Banyakatoriki, abantu bakaguma barekwirwe kumara akaanya kakye. Kwonka ku yaafiire ati, abantu baakeekoramu ekibiina ky'ebi baateekateekire ngu akaba naikiriza reero baataho enyikiriza z'ediini kandi n'ebiteekateeko batyo baayanga kwemera weena owaabaire agamba ebitari nk'ebyabo. Bakagaruka omu Bunyakatoriki n'empinduka nkye. Kandi n'eriizooba abakuratsi ba Luteeri beeteekateekire kugarukirayo kimwe.

Oo, eego! Omu Kushuuruurwa 17, ogwo maaraya owa ira akaba aine abahara baingi. Abahara aba nibashushana na nyina. Bata Ekigambo aha rubaju, bahakana omurimo gw'Omwoyo Orikwera wa Ruhanga, basingura kandi bategyeka abakuratsi, batyo baremeseza kimwe abakuratsi kuramya Ruhanga kureka abakuratsi baabarabamu nari baaraba omu nkora yaabo, eki ti kindi kureka engyenderwaho y'obutaikiriza erikuruga ahari Sitaane wenka.

Turi nkahi, oo turi nkahi, omu by'omwoyo? Turi omu ihamba ry'omwirima. Ka turariire hare n'ekanismu y'okubanza. Tihaine ahu Pentekoote erikureebwa kandi n'Ekigambo tikirikubaasa kuboneka. Okuhungurirana kw'entumwa, okukanyire ebiro ebi, tikurikushangwa omu Kigambo. N'akakoryo akakozirwe abantu. Okuhungurirana kw'entumwa omu buryo oburikuhenda amateeka nikuribatiirira amazima agarikugira ngu RUHANGA, ATARI MUNTU, akata abeebembezi Be omu kanisa. Petero akaba atakazaga Rooma. Kwonka nibabeiha bagira ngu akatuurayo. Ebyafaayo bihamya ku atakazagayo. Hariho abantu abashoma ebyafaayo, kwonka batengyetsa amabega bagarukayo omu kwikiriza ekishuba. Ni nkahi ahu orikubaasa kushanga "omutsigire wa Kristo" omu Kigambo? Tihariho n'omwe orikubaasa kuza omu mwanya Gwe, kwonka kikoziirwe kandi abantu baakiikiriza. Ni nkahi ahu orikubaasa kushanga okwo "kushuuruurirwa okwongyeirweho" nikwikirizibwa Ruhanga, okukira munonga okushuuruurirwa okurikuhakanisa okwo okuhairwe? Kwonka nibakwikiriza kandi bakuhamiraho. Ni nkahi ahu orikushanga "purigaatori"? Ni nkahi ahu orikushanga "misa"? Ni nkahi ahu orikushanga "kushashura sente ngu omuntu arugye gehena"? Tikiri omu Kigambo, kwonka abantu bakita omu kitabo kyabo kandi okukirabiramu banyaga abantu, nibabategyekyesa obwoba. Ni nkahi ahu orikushanga ngu "omuntu aine obushoboorozi bw'okutusaasira" orikushusha oti ni Ruhanga? "Emishega eshuugire," ti bigambo ebiine amaani agarikumara kushoboorora eki bari. Obunikolaiti. Ekibiina ky'ediini. Omuntu naategyeka ondijjo.

Mugarukye ahari Ruhanga. Mweteise obwire butakahweireyo. Mureebe engaro neehandiika aha kisiika. Neehandiika orubanja. Nk'oku ebintu ebirikwera ebikoresibwa omu hekalu byahagairweho kikareeta ekiniga kya Ruhanga, hati Ekigambo ekirikwera kihagairweho n'Omwoyo yaabiihirwa, kandi okucwerwa orubanja kuri hanu, aha rwigi. Mweteise! Mweteise! Mugarukye ahari Pentekoote. Mugarukye aha bwebembezi bw'Omwoyo Orikwera. Mugarukye aha Kigambo kya Ruhanga, mbwenu nimwendera ki kufa?

EIRAKA RY'OMWOYO

Okushuuruurwa 2:7, "Oine amatu ahurire eki Omwoyo arikugambira amakanisa. Orikusingura, Ndyamwikiriza kurya aha Muti gw'Amagara, oguri omuri paradiiso ya Ruhanga."

"Oine amatu ahurire eki Omwoyo arikugambira amakanisa." Nikibaasika ku zaamiriyoni z'abantu ziraije kuhurira ebigambo ebi nari zikabishoma. Kwonka ni bangahi abaraabiteho omutima? Ekyo titurikukimanya. Kwonka ogwo oraategye amatu ge kandi akenda ngu amanye ebigambo by'amazima naija kushanga Omwoyo wa Ruhanga naamumurikira. Amatu gaawe ku garaabe gaigwirwe aha Kigambo, Omwoyo wa Ruhanga naija kuhindura Ekigambo kuba ekihuriire ahariwe. Hati ogwo n'omurimo gw'Omwoyo. Nimbaasa kukwegyesa amazima, kwonka ku oraabe otaigwire amatu gaawe kugahurira kandi n'omutima gwawe kugaakiira toraatungye okushuuruurirwa.

Hati yetegereze, nikigira ngu Omwoyo naagambira amakanisa. Ago ni maingi, teri emwe. Omwoyo

tarakoreise Yohaana okuhandiika eki ahabw'ekanisa y'omu kyarokya Efeso, n'obu kwakuba ahabw'obusingye bw'okubanza bwonka. N'eky'obusingye bw'amakanisa goona. Kwonka egi n'ekanisa y'obutandikiro. N'ahabw'ekyo ni nk'Ekitabo ky'Okutandika. Ekyatandikiire omu kitabo ky'Okutandika nikiguma kiri amazima kuraba omu Kigambo kyona kandi aha muheru kihenderera omu kitabo ky'Okushuuruurwa. Mbweni, ekanisa egi erikutandikira omu kitabo ky'Ebyakozirwe niyo ngyenderwaho ya Ruhanga ahabw'obusingye bwona kuhitsya obu eraahenderere omu Busingye bwa Laodikia. Kireebe otairiho omutima. Ka buri busingye bufeyo, ahakuba ekirikukorwa hantu n'okutandika kwonka. Ogwo muti muto ogwabyairwe niguza kukura. Niguza kukura omu busingye bwona. Obu, mbweni, n'obutumwa obwa buri Mukristaayo omuri buri busingye okuhitsya obu Yesu araagarukye. Eego, nikwo, ahakuba n'Omwoyo orikugamba. Amiina.

OKURAGANISIBWA EKIHEMBO

Okushuuruurwa 2:7, “Orikusingura Ndyamwikiriza kurya aha Muti Gw'Amagara, Oguri omuri paradiiso ya Ruhanga.” Eki n'ekihembo ky'omu biro by'omu maisho aha basinguzi boona b'omu busingye bwona. Enzamba y'aha muheru y'okweta kuza aha rugamba ku eriheza kuteerwa, eby'okurwanisa byaitu byatairwe ahansi, obwo nitwija kuhuumurira omuri paradiiso ya Ruhanga kandi omugabo gwaitu guryaba Omuti Gw'Amagara, ebiro n'ebiro.

“Omuti Gw'Amagara.” Okwo t'okushushaniriza kurungi? Kigambirwe emirundi eshatu omu Kitabo ky'Okutandika kandi n'emirundi eshatu omu Kitabo ky'Okushuuruurwa. Omu myanya yona mukaaga nigwo muti gumwe kandi gukaba nigushushanisa ekintu ekyo kimwe buzima.

Baitu Omuti Gw'Amagara niki? Mbweni, eky'okubanza kya byona, twine kumanya omuti ogwo ahabwagwo eki gwemerereire. Omu kitabo ky'Okubara 24:6, nk'oku Balamu yaashoboroire Abaisraeli, akagira ngu bakaba bari emiti “y'enkaka ezi MUKAMA yaabyaire.” Emiti omu Byahandiikirwe byona neemanyisa abantu, nk'omuri Zaaburi 1. N'ahabw'ekyo Omuti Gw'Amagara niguteekwa kuba Omuntu w'Amagara, kandi ogwo ni Yesu.

Hati omu Kibanja kya Edeni hakaba harimu emiti ebiri eyemereire ahagati yaakyo. Gumwe gukaba guri Omuti Gw'Amagara, ogundi gukaba guri Omuti gw'Okumanya Oburungi n'Obubi. Omuntu akaba ari ow'okubaho ahabw'Omuti Gw'Amagara; kwonka akaba atashemereire kukwata aha muti ogundi kitari ekyo akaba naafa. Kwonka omuntu akarya ahari ogwo muti, kandi ku yaaguriireho, rufu yaamutaahamu ahabw'ekibi kye, atyo yaataana na Ruhanga.

Hati Omuti ogwo ogwabaire guri omuri Edeni, ogwo Muti ogwabaire guri enshuro y'amagara, akaba ari Yesu. Omuri Yohaana eshuura ya mukaaga okuhitsya aha ya munaana, Yesu naayeyoreka nk'enshuro y'amagara agatahwaho. Akeeyeta Omugaati ogwarugire omu iguru. Yaagamba aha kwehayo Kwe kandi ngu omuntu ku Yaakumuryaho takaafa. Akarangirira ku Yaabaire naamanya Abrahamu, kandi ngu Abrahamu atakabaireho, Akaba ARIHO. Akahanuura ku We Wenka yaabaire naija kubaha amaizi g'amagara kandi ngu omuntu origanywaho tarikwija kugira eiriho bundi, kwonka ngu aryatunga amagara agatahwaho. Akeeyoreka nka MBAHO OMUKURU. Niwe Mugaati Gw'Amagara, Eiziba Ry'Amagara, Ogwo Otahwaho, OMUTI GW'AMAGARA. Akaba ariyo okwo omuri Edeni ahagati y'ekibanja nk'oku Arikwija kuba ari ahagati ya paradiiso ya Ruhanga.

Abamwe baine ekiteekateeko ngu egyo miti ebiri omu kibanja ekaba eri nk'emiti endiijo yona ei Ruhanga yaabaire atairemu. Kwonka abeege abataireho omutima nibamanya ngu eki tikwo kiri. Yohaana omubatizi obu yaagamba n'eiraka rihango ngu empango eteirwe aha kitsintsi ky'emiti yona, akaba atarikugamba aha miti y'obutoosha, kureka akaba naagamba aha mateeka g'eby'omwoyo. Hati omuri 1 Yohaana 5:11, nihagira hati, “Kandi oku nikwo KUHAMYA okwo, ngu Ruhanga akatuha amagara agatahwaho, kandi amagara ago gari omu Mwana We.” Omuri Yohaana 5:40, Yesu akagira ati, “Kwonka mwanga kwija Ahariinye, ngu muheebwe amagara.” Ekigambo kya Ruhanga, oku kihandiikirwe, nikyoreka butunu ku AMAGARA, AMAGARA AGATAHWAHO, gari omu Mwana. Tigari ahandi hoona. 1 Yohaana 5:12, “Omuntu oine ogwo Mwana niwe aine AMAGARA; otaine Mwana wa Ruhanga TAINÉ Magara.” Hati obu ebihandiikirwe bitarikubaasa kuhinduka, okucubwaho, nari okwongyerwaho n'ahabw'ekyo ebihandiikirwe nibihama ku AMAGARA GARI OMU MWANA. Obu eki kiri kityo, OMUTI OGURI OMU KIBANJA NAATEEKWA KUBA ARI YESU.

Kare. Omuti Gw'Amagara ku araabe ari omuntu, n'Omuti gw'Okumanya Oburungi n'Obubi NAGWO n'omuntu. Tikirikubaasa kuba okundi. N'ahabw'ekyo Ogwo Ohikiriire akaba ayemereire aha rubaju rw'Ogwo Mubi rwagati okwo omu Kibanja kya Edeni. Ezekieli 28:13 a “Iwe (Sitaane), okaba ori omuri Edeni, ekibanja kya Ruhanga.”

Hantu niho turikutungira okushuuruurirwa okw'amazima “kw'oruzaaro rw'Enjoka.” Buzima aha niho ekyabaireho omuri Edeni kiri. Ekigambo nikigira ngu Haawa akategwa enjoka. Omu bwijwire, Haawa akashendashendwa enjoka. Omu kitabo ky'Okutandika 3:1 nihagira hati, “Kandi enjoka ekaba eri enyabwengye okukira enyamaishwa zooni ezi MUKAMA RUHANGA yaahangire.” Enyamaishwa egi ekaba eri haihi kushushana n'omuntu (kwonka ekaba eri enyamaishwa kashushu) ahabw'okuba ekaba neebaasa kuteesa n'okugamba n'abantu. Ekaba eri ekihangirwe ekyabaire kigyenda bwemi nk'omuntu, omu kushushana kwayo ekaba eri ahagati y'empundu n'omuntu, kwonka eri haihi munonga n'omuntu. Ekaba eri haihi kushushanira kimwe n'omuntu kuhitsya obu entanga yaayo yaajwangaine n'ey'omukazi kikamureetera kutwara enda. Eki ku kyabaireho, Ruhanga yaakyeena enjoka. Ruhanga yaahindura buri igufa ery'omu mubiri gw'enjoka etyo yaatandika kwekurura ahansi nk'enjoka z'obutoosha. Sayansa neebaasa kugyezaho kyona eki erikubaasa, kwonka terikubaasa kuzooro

akakwate akaabuzireho. Ruhanga niwe yaakikozire. Omuntu n'omunyabwengye naabaasa kureeba obuzaare obu omuntu aine n'enyamaishwa kandi agezeho kubworeka naarabira omu “kuhinduka kw'ekintu mporampora kikarugwamu ekindi bwanyima y'obwire buraingwa.” Tihariho ekirikwetwa “okuhinduka kw'ekintu mporampora kikarugwamu ekindi bwanyima y'obwire buraingwa.” Kwonka omuntu n'enyamaishwa bikajwangana. Egyo n'emwe aha naama za Ruhanga eyaabaire etwire esherekirwe, kwonka hati eshuurwirwe. Kikabaho okwo rwagati ya Edeni obu Haawa yaayanga Amagara akaakiira Okufa.

Yetegereze oku Ruhanga yaabagambiire omu kibanja kya Edeni. Okutandika 3:15, “Kandi Ndyata obuzigu ahagati yaawe n'ogu mukazi, n'ahagati y'oruzaaro rwawe n'Orwe; orwe Ruryakuteera omutwe, naiwe Oryaruteera ekitsintsiino.” Ku turaikirize Ekigambo kya Ruhanga ngu omukazi akaba aine Oruzaaro, n'enjoka nayo buzima neeteekwa kuba yaabaire eine oruzaaro. Oruzaaro rw'omukazi ku ruraabe rwabaire ruri omwana w'omwojo owaazairwe hatariho omukazi kumanyana n'omushaija omu by'omubonano, n'oruzaaro rw'enjoka narwo nikwo ruraabe omu muringo nigwo gumwe, omwojo ondiijo naateekwa kuzaarwa hatariho omukazi kumanyana n'omushaija omu by'omubonano. Tihariho mwegi n'omwe otarikumanya ku Oruzaaro rw'omukazi yaabaire ari Kristo Owaizire ahabw'amaani ga Ruhanga, hatariho omukazi kumanyana n'omushaija omu by'omubonano. Kandi nikimanywa kurungi ku ekyo ekyahanwirweho eky'okuhutaaza omutwe gw'enjoka omu mazima bukaba buri obunabi oburikukwata aha ki Kristo yaabaire naija kuhikiiriza aha musharaba ahari Sitaane. Aho aha musharaba Kristo akaba naija kuhutaaza omutwe gwa Sitaane, na Sitaane nawe akaba naija kuhutaaza ekitsintsiino kya Mukama.

Ekicweka ky'Ebyahandiikirwe eki n'okushuururirwa okurikworeka oku oruzaaro rw'enjoka rwabibirwe omu nsi, nk'oku twine ebyagambirwe Luka 1:26-35, omu kirikworeka oku Oruzaaro rw'omukazi rwayorekirwe omu mubiri hatariho omushaija kumanyana n'omukazi omu by'omubonano. “Omu kwezi kwa mukaaga maraika Gaburieli akatumwa Ruhanga omuri tauni ya Galilaaya erikwetwa Nazareesi, aha mwishiki oshugaine, owaabaire naagambwa obugyenye omushaija orikwetwa Yosefu, ow'omu nju ya Daudi; eiziina ry'omwishiki ogwo akaba ari Mariamu. Gaburieli yaija ah'ari, yaamugambira ati: Shemererwa, iwe orikukundwa munonga! Mukama ari naiwe. We yaayekanga munonga ahaw'ekigambo ekyo, naateekateeka okuramutsya okwo oku kuri. Maraika yaamuhumura naagira ati: Otatiina, Mariamu, ahabw'okuba otungire obuganzi ahari Ruhanga. Reeba oryagira enda, ozaare omwana w'Omwojo, kandi oryamweta Eiziina YESU. Aryaba mukuru, aryayetwa Omwana wa Rukira-boona; kandi Mukama Ruhanga Aryamuta aha kitebe ky'obugabe bwa Ishenkuru Daudi, ategyekye enju ya Yakobo ebiro byona, kandi obukama Bwe tiburihaho. Mariamu yaabuza maraika ati: Ekyo kiryabaasika kita, ka ntaine mushaija? Maraika yaamugarukamu ati: Omwoyo Orikwera aryakwizira, n'amaani ga Rukira-boona garyakusangira; Omwana Orizaarwa nikyo aryeterwa Orikwera, Omwana wa Ruhanga.” Nk'oku Oruzaaro rw'omukazi yaabaire ari Ruhanga buzima Arikwezaarira omu mubiri gw'omuntu, n'oruzaaro rw'enjoka nigw'omuhanda gwonyini ogu Sitaane yaashangire arikubaasa kweyiguriraho orwigi kutaaha omu bantu. Kikaba kitarikubaasika Sitaane (ahakuba n'EKIHANDIRWE ky'omwoyo kwonka) okwezaarira omu muntu omu muringo ogu Ruhanga Yaayezaariiremu, n'ahabw'ekyo okushoboorora okuri omu kitabo ky'Okutandika nikutugambira oku Sitaane yaareetsire embibo ye n'oku yaabyaire embibo ye omu ruganda rw'abantu. Garuka oijukye ngu Sitaane naayetwa “enjoka.” N'oruzaaro rwe nari eki yaabyaire omu bantu nikyo turikugambaho.

Adamu ku yaabaire atakamanyire omukazi we Haawa, enjoka ekamumutangaho. Kandi ogwo owaazairwemu ni Kaini. Kaini akaba ari (owaazairwe, owaakomookire) aha “Mubi.” 1 Yohaana 3:12. Omwoyo Orikwera omuri Yohaana akaba atarikubaasa kweta Adamu “Omubi Ogwo” omu mwanya gumwe (ahakuba ekyo nikyo yaakubaire ari kuri yaabaire ari ishe wa Kaini) reero omu mwanya ogundi akeeta Adamu “Omwana wa Ruhanga” eki yaabaire ari omu buhangwa. Luka 3:38. Kaini akahika yaagira engyesho nk'eza ishe, owaareetsire okufa, kandi omwitsi. Okugambisa obugomi kwa Kaini ahari Ruhanga obu yaabugana Ow'obushoboorozi bwona omu Kutandika 4:5, 9, 13-14 nikyorekyera kimwe oku emitwarize ye etari y'obuntu, omu Byahandiikirwe byona tihariho ahu turikushanga okwehanga nk'oku ahu Sitaane yaarabugaine Ruhanga. “Kwonka tiyaasiima Kaini n'ebi yaatoija. Kaini yaagira ekiniga kingi, yairirimba aha maisho. Mukama yaabuza Kaini ati: Abeeli murumuna waawe arahi? Kaini yaagarukamu ati: Tindikhamanya. Niinye murinzi wa murumuna wangye? Kaini yaagira MUKAMA ati: Ekifubiro eki wampa ni kihango, tikirikubaasa kwemerwa. Reeba, eri izooba wancwa aha itaka, kandi tinkireebwa omu maisho Gaawe; ndyaguma ndi empungi n'ekizengerezi omu nsi; kandi orindeeba weena aryanyita.”

Yetegereze kurungi oku Ruhanga arikushoboorora aha kuzaarwa kwa Kaini, Abeeli na Seezi. Okutandika 4:1, “Bwanyima Adamu yaamanya Haawa omukazi we, yaagira enda, yaazara Kaini; yaagira ati: Ntungire omwana w'omwojo ahabw'okuhwerwa Mukama. Yaagaruka, yaazara Abeeli omurumuna.” Okutandika 4:25 “Adamu yaagaruka yaamanya omukazi we, yaazaara omwana w'omwojo, yamweta Seezi.” Adamu akamanya omukazi we emirundi EBIRI kwonka Baiburi neetworeka ku hazairwemu abaana BASHATU b'Aboojo. Obu Baiburi eri Ekigambo kya Ruhanga ekihikire, aha tihariho nshobi kwihaho n'Ebyahandiikirwe ebirikutumurikira. Adamu ku araabe yamanyire Haawa emirundi EBIRI kwonka hakazaarwamu aboojo BASHATU, noomanyira KIMWE ngu OMWE omuri abo bashatu AKABA ATARI mutabani wa Adamu. Ruhanga akahandiikisa ebi omu muringo ogu kugira ngu agire eki yaatworeka. Amazima g'eki gari ngu Haawa akaba aine abaana b'aboojo BABIRI omunda ye (empasha) atwekirwe ABASHAIJA BABIRI. Akaba atweire enda y'empasha, obwo enda ya Kaini yaagitwaire atakatwaire eya Abeeli. Garuka oyetegereze ezo MPASHA. Ekirikworeka ekihikire nka buriijo. Ahari abo abarikuteekateeka ngu eki tikirikubaasika, ka kimanywe ngu hariho bingi ebirikuhamibwa abashaho ebirikworeka ku hariho abakazi abaatwaire enda z'empasha ezirugire omu mahuri abiri g'ekikazi agatarikushushana

agaatwekirwe omu biro ebitarikushushana omu kwezi kumwe, kandi TIKIRI KITYO KWONKA, kureka bimwe aha bihandiiko nibyoreka ku empasha ezo zaazairwe abashaija abatarikushushana. Enshumi nkye ehingwire eihurire eririkushomwa omu nsi yoona hakaba harimu omukazi omuzaire ow'eihanga rya Norway owaabaire naahababira iba ahabw'okutamuyamba n'empasha ze, obwo omwe ahari ezo mpasha yaabaire ari omujungu ondiijo ari omwiragujju. Akaikiriza ku yaabaire aine Omwiragujju nkuzi ye. Okubaka enda kw'empasha ezi kukaba nikukizanaho saabiiti ishata ahagati yaazo. Omuri Beaumont, Texas, omu mwaka gwa 1963, ebihandiiko bikagaruka byayoreka okuzaarwa kw'abaana b'empasha bashatu abu enda zaabo zaabaire zitweirwe ahanyima y'ebiro bingi ahagati yaabo, okuhitsya obu omukazi yaabaire ari haihi kufa naazaara omwana omwe ahari abo bashatu.

Hati ahabw'enki eki kyabaire kiine kuba kityo? Ahabw'enki kyabaire kiri ngu oruzaaro rw'enjoka rukaba niruteekwa kwija omu muringo ogu? Omuntu akahangwa ahabwa Ruhanga. Omuntu akaba ari ow'okuba hekalu ya Ruhanga. Omwanya gwa Ruhanga ogw'okuhuumuriramu (Omwoyo Orikwera) akaba ari omuntu, hekalu. Ebyakozirwe 7:46-51, "Daudi ogwo, ku yaatungire obuganzi omu maisho ga Ruhanga, yaashaba kwikirizibwa kusherurira Ruhanga wa Yakobo ah'okutuura. Kwonka Sulemaani niwe yaamwombekyeire enju. Haza Rukira-boona atatuura mu maju agombekirwe emikono, nk'oku nabi yaagizire ati: Eiguru nikyo kitebe Kyangye ky'obukama, n'ensi n'akatebe k'ebigyere Byangye. Ni nju ki ei murinyombekyera? nikwo Mukama arikubuuza, nari shi ni mwanya ki ogu ndihuumuriramu? Omukono gwangye tigwo gwahangire ebyo byona? Imwe ab'ebitsya bigangaire, abatashazirwe mu mitima n'omu matu, murwanisa obutoosha Omwoyo Orikwera! Nk'oku bashwenkuriimwe baakozire, naimwe nikwo mukora." Sitaane atwire naamanya eki obwire bwona. Nawe naayenda ngu atuure omu muntu nk'oku na Ruhanga akora. Kwonka Ruhanga akeetsigariza obushoboorozi obwo. Sitaane akaba atarikubaasa kukora ekyo. Ruhanga wenka niwe yaareebekyeire omu mubiri gw'omuntu. Sitaane tarikubaasa kandi takaabaasa kukora ekyo. Taine maani g'okuhanga. Omuringo gwonka gwa Sitaane kuhikiiriza eki yaabaire naayenda kukora gukaba guri okutaaha omu njoka omuri Edeni nk'oku yaataahire omu mpunu kurabira omu myoyo mibi omuri Gadara. Ruhanga tataaha omu nyamaishwa; kwonka Sitaane naabaasa kandi naija kukikora kuhikiiriza ebigyendererwa bye. Akaba atarikubaasa kutunga omwana omu muringo ogugororokire ahari Haawa nk'oku Ruhanga yaakikozire ahari Mariamu, n'ahabw'ekyo akataaha omu njoka atyo yaatega Haawa. Sitaane akarabira omu njoka yaashendashenda Haawa atyo yaamutungaho omwana. Kaini akaba aine emicwe y'eb'omwoyo eijwire ya Sitaane n'emcwe y'obunyamaishwa (okucamukirira, obunyamubiri) by'enjoka. Tiky'okutangaaza Omwoyo Orikwera akagira ngu Kaini akaba ari ow'omubi. Akaba ariwe.

Hati niinyenda kuza omu buhame ku hariho obuzaare obutarikubanganisibwaho ahagati y'omuntu n'enyamaishwa. N'ekintu ekirikureebeka. Noomanya ku noobaasa kwiha obutafaari bw'omubiri gw'akaana k'enyamaishwa akatakazairwe okabutaasya omu mibiri y'abantu? Bwanyima obwo butafaari bw'omubiri obw'akaturugunyu k'aha maraka nibugyendera kimwe omu buturugunyu bw'omu maraka g'omuntu, obutafaari bw'omubiri bw'entsigo nibugyendera kimwe omu ntsigo z'omuntu. Nooyetegyereza oku eki kirikutangaaza? Hariho obwengye oburikworekyerera obwo butafaari bw'omubiri bw'enyamaishwa kubuhitsya omu mwanya oguhikire buzima. Obwengye obwo nibwakiira obwo butafaari bw'omubiri bubuhikiza kimwe omu mwanya oguhikire. Hariho obuzaare ahagati y'enyamaishwa n'omuntu. Omuntu n'enyamaishwa tibikaabaasa kuteerana bikazaara. Ekyo bakagigyezaho. Kwonka okwo omu kibanja enjoka ekateerana na Haawa yaazaara kandi obuzaare bw'omu mubiri obukiriho nibukihama. Ahakuba okwo omuri Edeni enjoka ekaba eri ekihangirwe ekyabaire kigyenda bwemi nk'omuntu. Ekaba eri haihi kushushana n'omuntu. Ekaba eri haihi kuba omuntu. Sitaane akeejunisa obuhangwa bw'omubiri gw'enjoka kugikoresa kusoonaasooona Haawa. Bwanyima Ruhanga Yaacwekyereza obwo buzaare bw'enjoka. Tihariho ndiijo nyamaishwa erikubaasa kuzaara n'omuntu. Kwonka obuzaare buriho.

Hati obu twahika hare tuti, reka ngyezeho kwetegyerezesa okuteekateeka kwawe aha ishomo eri kugira ngu obaase kwetegyereza ekyetengo kyaitu ky'okutaaha omu "nyegyesa y'oruzaaro rw'enjoka" nk'oku ngizire. Nitutandika n'ekirikugira ngu hakaba hariho emiti EBIRI ahagati y'ekibanja. Omuti gw'Amagara akaba ari Yesu. Ogundi muti tihariho kubanganisa ni Sitaane ahabw'ekyarugire omu kijuma ky'ogwo muti. Hati mbwenu, nitumanya ngu emiti egyo yombi ekaba eine obuzaare aha muntu kitari ekyo tekaabaire yaateibweyo na kakye. Neeteekwa kuba yaabaire eine omwanya omu ntebeekanisa y'okwemariirira n'ekigyendererwa kya Ruhanga omu buzaare bwayo aha muntu kandi n'Ahariwe Wenka kitari ekyo Ruhanga titukaamubariire kumanya byona na kakye. Ahu twahika ebi byona n'amazima, tikwo kiri? Hati Ekigambo nikyorekyera kimwe butunu ngu ensi ETAKAHANGIRWE ekigyendererwa kya Ruhanga kikaba kiri okubagana Amagara Ge Agatahwaho n'omuntu. Abaefeso 1:4-11, "Nk'oku Yaatutooraniire Omuriwe ahabwa rukundo, ensi etakahangirwe, ngu tube abarikwera abataine kamogo omu maisho Ge. Akatutoorana tutakabaireho, ngu tuhindurwe abaana Be ahabwa Yesu Kristo, nk'oku Yaasiimire omu kukunda Kwe, ngu embabazi Ze ez'ekitiinisa zisiimwe, ezi Yaatuheereire busha omuri Ogwo ou akunda. Omuri Ogwo tuheebwa okucungurwa ahabw'eshagama Ye, okusaasirwa eby'okushiisha byaitu, nk'obutungi bw'embabazi Ze oku buri, ezi Yaatusheeshekaizeho. Ahakuba akatumanyisa enaama y'okukunda Kwe omu bwengye bwona n'okwetegyereza kwona, nk'ebi Yaagyendereire kworeka omuri Kristo oku biri, ngu Atebeekanise ebintu, kandi obunaku ku burihika, Abone kuteeranira atyo byona omuriwe nk'Omumwe, eby'omu iguru n'eb'omu nsi. Omuriwe naitwe nimwo twahindukiire obuhunguzi, obu twatooranwa tutakabaireho, ahabw'okukunda kw'Ogwo Ohikiiriza byona, nk'oku Yaasiimire omu naama Ye." Okushuururwa 13:8, "Boona abatuura omu nsi baryagirama (Sitaane), abu amaziina gaabo gatahandiikirwe mu Kitabo ky'Amagara eky'Omwana gw'Entaama owaitsirwe okuruga aha kuhanwa kw'ensi." Kwonka Amagara ago gakaba

gatarikubaasa, kandi tigaakubaire nigabaganwa omu muringo ogundi gwona gutari okurabira omu muhanda gwa “Ruhanga okweyoreka omu mubiri.” Eki kikaba kiri ekicweka ky'ekigyendererwa Kye eki Yaamanyire ira kandi ekitahwaho. Puraani egi ekaba eri ey'okuhimbisa ekitiinisa ky'embabazi Ze. Ekaba eri puraani y'Obucunguzi. Ekaba eri puraani y'Okujunwa. Hati hurikiza kurungi. “Ruhanga ahabw'okuba Omujuni, kikaba nikyetaagisa ngu Atebeekanisize omuntu atakabaireho owaabaire naija kwetenga okujunwa kugira ngu kihe Ruhanga enshonga kandi n'ekigyendererwa ky'okubaho.” Ekyo kihikire obucweka igana ahari igana kandi Ebyahandiikirwe bingi munonga nibikihama nk'oku omushororongo gw'omu Barooma 11:36 gurikworeka: “Ahakuba BYONA niwe bikomookaho, kandi bibaho Ahabwe, kandi niwe Mukama waabyo; Aheebwe EKITIINISA ebiro byona. Amiina.” Omuntu akaba atarikubaasa kwija we wenka nikwo akarya ahari ogwo Muti Gw'Amagara ogwabaire guri ahagati y'ekibanja. Ago Magara Agatahwaho g'ogwo Muti gakaba nigateekwa kubanza gaaba omubiri. Kwonka Ruhanga atakaimukire ngu ajune omusiisi, Akaba naateekwa kugira omusiisi w'okwimutsya kandi akajuna. Omuntu akaba naateekwa kugwa. Okugwa okwabaire nikwija kureetwa Sitaane, kukaba kwine kugira omubiri kukabona kureetaho okugwa. Sitaane nawe akaba naateekwa kurabira omu mubiri. Kwonka Sitaane akaba atarikubaasa kwizira omu mubiri gw'omuntu kureetaho kugwa nk'oku Kristo yaiziire omu mubiri gw'omuntu kugarura busya abaagwire. Kwonka hakaba hariho enyamaishwa, enjoka, eyaabaire neeshushana munonga n'omuntu na Sitaane arikubaasa kuhika ahari egyo nyamaishwa kandi okurabira omuri egyo nyamaishwa akabaasa kuhika aha mubiri gw'omuntu atyo akareetaho kugwa, kandi omuri obwo buryo akeetaasya omu ruganda rw'abantu, nk'oku na Yesu yaabaire eizooba rimwe naaza kwija Akeetaasya omu ruganda rw'abantu, omu mubiri y'abantu, nangwa n'okuhikira kimwe aha kuzooka omu twabaire nituza kutungira emibiri erikushushana n'Ogwe oguhairwe ekitiinisa. N'ahabw'ekyo eki Ruhanga yaakozire hanu omu kibanja ekaba eri entebeekanisa Ye ei yaamanyire ira. Kandi Sitaane ku yaareetsireho ekyo ekyabaire nkyetengwa aha kigyenderwa kya Ruhanga, obwo omuntu akaba atarikubaasa kuhika aha Muti Gw'Amagara oguri omu kibanja. Buzima tikirabaasikire. Obwire bukaba butakahikire. Kwonka enyamaishwa (enyamaishwa ekaba yaareetsireho kugwa, terakikozire? k'amagara g'enyamaishwa gasheeshekye) ekatwarwa kandi eshagama yaayo yaasheesheka reero Ruhanga yaagaruka yaakwatanisa n'omuntu. Kandi hakaba nihaija kubaho ekiro obu Ruhanga yaabaire naija kureebekyera omu mubiri, reero okurabira omu kuhemurwa Kwe Akaba naija kugarura busya omuntu ogwire kandi Akamubaasiisa kubagana aha Magara Agatahwaho. Waaheza kureeba eki, noobaasa kwetegyereza oruzaaro rw'enjoka kandi omanyereye ngu tikiri kijuma kya apo eki Haawa yaariire. Ngaaha, kukaba kuri okushiisha kw'okugarura ahansi emicwe y'obuntu omu buryo bw'okujwanza embibo.

Hati nimmunya ngu omu kugarukamu ekibuuzo kimwe, ekindi nikirahuka kwimuka, kandi abantu nibambuuzwa bati, “Haawa ku araabe yaagwire omu buryo obwo, Adamu we akakora ki, ahakuba Ruhanga naata orubanja ahari Adamu?” Ekyo kyanguhi. Ekigambo kya Ruhanga kihamire omu iguru ebiro byona. Hatakagizire akacuucu kakye k'enyonyoozi akahangwa, ekyo Kigambo (ekiragiyo kya Ruhanga) kikaba kiriyo BUZIMA NK'OKU KIHANDIIRWE OMURI BAIBURI YAITU. Hati Ekigambo nikitwegyesa ngu omukazi ku araatsigyeho iba akagyenda n'ondijjo mushaija naaba ari omushambani kandi naaba atakishweirwe kandi iba tashemereire kumugarura. Ekigambo ekyo kikaba kiri amazima omuri Edeni nk'oku kyabaire kiri amazima obu Musa yaakihandiika omu biragiyo. Ekigambo tikirikubaasa kuhinduka. Adamu akamugarura. Adamu akaba naamanya buzima eki yaabaire naakora, kwonka akagumizamu yaakikora. Haawa akaba ari orubaju rwa Adamu, kandi Adamu akaba naayenda kutwara obujunaanizibwa bwa Haawa. Adamu taramurekire kugyenda. Ahabw'ekyo Haawa yaabaka enda ya Adamu. Adamu akaba naamanya ngu Haawa naija kubaka enda. Adamu akaba naamanyira kimwe ekyabaire nikiza kuba aha ruganda rw'abantu, atyo yaataasya oruganda rw'abantu omu kibi kugira ngu abaase kuguma na Haawa, ahakuba akaba naamukunda.

N'ahabw'ekyo abo baana babiri b'aboojo bakazaarwa. Aboojo abaabaire nibaija kuba baishenkuru b'oruganda rw'abantu orwabaire na hati rwasiisikaire. Beitu ebihandiikirwe nibibagambaho ki? Shoma ebihandiikirwe. Yuda 14, “Kandi abo nibo Enoka, owa mushanju okuruga ahari Adamu, yaaragwireho . . .” Okutandika 5 n'eshuura erikutondoora obukomooko bwa Enoka. Neeheereza obwo bukomooko omuri obu buryo, 1. Adamu, 2. Seezi, 3. Enosi, 4. Kenani, 5. Mahalaleeli, 6. Yaredi, 7. Enoka. Yetegyereze ngu Kaini tagambirweho. Orunyiriri rw'abaakomookire omuri Adamu nirurabira omuri Seezi. Kaini ku araabe yaabaire ari omwana wa Adamu, ekiragiyo ky'obuhunguzi bw'omujigaijo kikaabaire kihaire Kaini omwanya omu runyiriri rw'abaakomookire ahari Adamu. Eki nakyo nikiteekwa kwetegyerezibwa n'obwegyendesereza ku omu kitabo ky'Okutandika 5:3, nihagira hati, “Adamu ku yaamazire emyaka igana na makumi ashatu, yaazaara omwana w'omwojo orikumushusha omu muringo gwe, yaamweta Seezi.” Tihariho ahu kirikugira ngu Kaini akaba ari omu nshusha ya Adamu, kandi nikwo yaakubaire kuri yaabaire ari mutabani we, ahakuba ekiragiyo ky'okwezaara nikihamiza kimwe ngu buri kimwe kizaare ekirikukishusha. Nituteekwa nabwo kusiima amazima aga ngu omu kutondoora obukomooko omu kitabo ky'Okutandika kandi na Luka, Kaini tarimu. Kuri Kaini yaabaire ari mutabani wa Adamu hakaabaire haine ahu kimugambirweho ngu, “Kaini, owaabaire ari omwana wa Adamu, owaabaire ari omwana wa Ruhanga.” Tikirikugamba kityo ahakuba TIKIRIKUBAASA kugamba ekyo.

Buzima abeege kumara obwire buraingwaga boorekire enyiriri ibiri z'abantu: rumwe orwabaire ruri orw'abarikutiina Ruhanga rurikushangwa omuri Seezi kandi orundi ruri orw'abatatiina Ruhanga orwatandikirwe Kaini. Kandi eki nikitangaaza, kwonka n'amazima, abeege aba nibo bamwe tibakatugambiraga ekyatumire Kaini yaaba omuntu w'omuringo ogu yaabaire ari kandi obwo Abeeli na Seezi baabaire bari ab'omwoyo, orunyiriri orw'abarikutiina Ruhanga. Nk'oku kyakubaire, Kaini akaabaire ari ow'omwoyo kandi Abeeli aba ow'omwoyo kakye, reero Seezi kakyeho munonga, n'okugumizamu batyo kushuuma omuri orwo runyiriri ahabw'okuba buri

busingye obwabaire bukurataho obutoosha bukaba bweyongyera kuza hare na Ruhanga. Kwonka ngaaha, Kaini naarugayo ari mubi kukira ondiiho muntu weena owaarashoboroirweho ahakuba naahakanisiza kimwe n'obuhaze Ruhanga n'Ekigambo.

Hati reka eki kimanywe: Ebyahandiikirwe tibizaanisa bigambo. Ekiri omu Bihandiikirwe kyona kirimu ahabw'amaisho g'omwoyo kukireeba. Kirimu ahabw'ekigyendererwa. Omuri ekyo Kigambo nikigira kiti, Okutandika 3:20, "Omushaija yaayeta omukazi we eiziina Haawa, ahakuba niwe nyina w'abahuriire boona." Kwonka tihaine Ekyahandiikirwe ekiragizire ngu Adamu niwe ishe w'abahuriire boona. Ku haraabe hatariho ekindi ky'okwongyeraho amakuru aha kitabo ky'Okutandika 3:20, ahabw'enki kyagambirwe ngu Haawa ni nyina wa boona, kandi hataine kigambo ekyagambirwe ahari Adamu? Amazima gari ngu n'obu Haawa yaabaire ari nyina w'abahuriire boona, Adamu akaba atari ishe w'abahuriire boona.

Omu Kutandika 4:1, Haawa akagira ati, "Ntungire omwana w'omwojo ahabw'okuhwerwa MUKAMA." Haawa tarikusiima Adamu ngu ni ishe wa Kaini. Kwonka omu Kutandika 4:25 naagira ati, "Ruhanga yanshumbuusha ONDIIJO mwana OMU MWANYA GWA ABEELI, ou Kaini yaitsire." Haawa tarikugira ngu Ruhanga akaba AMUHAIRE ondiiho mwana - ogwo akaabaire ari Kristo, ahakuba Kristo NAAHEEBWA. Ogu mwana, Seezi, akaba ENSHUMBUUSHANO omu mwanya gwa Abeeli. Haawa akeemera omwana we owaarugire ahari Adamu; tarikwemera Kaini hati ahakuba akaija naarabira omu njoka. Haawa ku arikugamba OMWANA ONDIIJO omu mwanya gwa Abeeli, naaba naagira ngu akaba aine omutaano ahari Abeeli, ahakuba kuri baabaire baine ishe omwe Haawa akaabaire yaagizire ati, "Mpairwe ONDIIJO MWANA."

Tiinyikiriza buri kintu eki nshoma, kwonka eki buzima n'ekintu kirikutangaaza kushanga ngu orupapura rw'amakuru rwa LIFE orwashohoire 1 Okwakashatu 1963, harimu ripoota y'abashaho b'endwara z'omutwe erikugambira kimwe ekintu nikyo kimwe eki turikugambaho. Hati nimmanya ngu abashaho b'endwara z'omutwe boona tibarikwikirizana, kwonka nkiki hanu. Okutiina enjoka tikuri kwekanga kw'aharuguru kureka n'okuri omu muntu. Ku kwakubaire kuri okutiina kw'obutoosha obwo abantu bakaayemereire bashemereirwe nk'oku batwaza baaba nibashamaarira engagi nari entare ezirindiirwe omu biju. Ebiteekateeko byabo ebibaizira batakimanyiise bibareetera kuguma bahangire enjoka amaisho. Okwo kushamaaza kw'enjoka kurimu emitwarize y'ekishaija kumanyana n'ekikazi etagyendereirwe. Kumanya ngu kitwireho omu busingye bwona nikireebwa abantu b'omu busingye oburikwihaihana nibatwaza omu buryo bumwe. Enjoka zitwire ziri kandi ziryaguma nizishamaaza omu muringo ogurikutiinisa. Enjoka etwire eriho nk'akamanyiso k'oburungi n'obubi.

Etwire eri ekishushani ky'amaani g'obushaija agarikuzaara omu busingye bwona. Buzima kwo nk'okushoboorora kw'omu Kibanja kya Edeni, nitushanga enjoka erikworekwa omu buntu bw'okurigira kubi.

Kiri haihi omu nsi yoona ahagati y'enganda ezitarikushushana ezitahutuukire ku enjoka eine akakwate n'eby'okuteerana kw'omu mubonano kandi kaingi eramibwa n'ebyo bigaitirainemu. Okwega aha by'okuteerana omu by'omubonano nikubyoreka omu by'okureeberaho bingi. Hati nkaayenzire kumanya ahu abantu aba baabiihire, kandi obwo bategeyesibwe kandi batakashomaga Baiburi. Kandi nk'oku n'ebyafaayo by'omwegyemure birikumanywa omu nsi yoona nikwo n'amazima aga ag'okugwa kw'omuntu garikumanywa. Bakamanya ekyabaireyo omuri Edeni.

Hati hanu omuntu naaza kumbuuzza ekibuuzo eki: Ruhanga akagambira Haawa kwetantara enjoka kitari ekyo enjoka ekaba neija kumusoonasoon? Hati hurikiza, Ruhanga kikaba Kitarikumwetaagisa kugamba ekintu na kimwe ahari ekyo ekyabaire nikiza kubaho. Tunga ekikuru ky'ebirikugambwaho. Ruhanga akaha Ekigambo kwonka. Ruhanga akagira ngu batarya aha KUMANYA. Barye aha MAGARA. AMAGARA GAKABA GARI EKIGAMBO KYA RUHANGA. OKUFA KUKABA KURI EKINTU KYONA EKYABAIRE KITARI KIGAMBO KYA RUHANGA. Haawa akaikiriza EKIGAMBO KIMWE kuhindurwa kandi aho niho Sitaane yaamukwatiire. N'obu Ruhanga yaakugambire ati, "Otongyera kucwa ebindi bijuma aha miti ebi otarikubaasa kurya." Sitaane akaba naabaasa kugamba ati, "Reeba, ekyo kihikiire kimwe. Nooreeba ku oraacwe bingi munonga nibiza kujunda. Kwonka hanu hariho obundi buryo bw'okurindiramu ebijuma bitasisikare kandi obwire nibwo bumwe noobaasa kucwa ebi orikwenda byona. N'ahabw'ekyo nooreeba, noobaasa kugira omuhanda gwawe n'ogwa Ruhanga omurundi gumwe." Sitaane akaba naija kumukwatira aho. Ogwo osingirwe KIMWE aha biragiyo naaba ahenzire ebiragiyo BYONA. Reka kuzaanisa ekyo Kigambo. Buzima ekyo nikyo kyabaireho omu busingye bwa Efeso butakahwaireho nk'omu mwaka gwa 170 A.D.

Omuti ogwo gukazaara ki? Omuti gw'Okumanya gukazaara okufa. Kaini akaita omurumuna, Abeeli. Omubi ogwo akaita ohikiriire. Kikataho enkora. Nikiija kugumizamu n'egyo nkora okuhitsya aha kugarurwa busya kw'ebintu byona nk'oku kyagambirwe baanabi.

Omuti gw'Okumanya gukazaara abantu b'obwengye; abantu abaarangainwe. Kwonka emihanda yaabo n'emihanda ya rufu. Abantu ba Ruhanga banguhi kwonka bata omutima aha by'omwoyo, beegamiire Ruhanga kandi n'eby'obuhangwa, nibahinga eitaka omu bucureera, nibata omutima aha mazima kukira eitungo. Oruzaaro rw'enjoka rureetsire eby'obushuubuzi bw'amaani, okujumbura okurikutangaaza, kwonka ebi byona biija n'okufa. Obuganga bw'embundu kandi na zaabomu za atomiki ziita omu ntaro; kandi omu bwire bw'obusingye ebyoma byabo ebijumbwirwe, nk'emotoka, biita baingi omu bwire bw'obusingye kukira oku ebijumbwirwe by'orutaro bihwerekyereza omu bwire bw'akabi. Okufa n'okucwekyereza nibyo byana by'emirimo y'oruzaaro rw'enjoka.

Kwonka n'abanyadiini. Nibaikiririza omuri Ruhanga. Nibashusha nka ishebo, sitaane, kandi nka ishenkurubo, Kaini. Bombi bakaba nibaikiririza omuri Ruhanga. Nibaza aha kanisa. Nibeejwanzya n'abarikwera nk'oku enkyenzi zijwanga n'engano. Omu kukora batyo bashiisha kandi bazaara ediini y'Ekinikolaiti. Bajanjaaza obutwa bwabo n'amaani goona okuhwerekyereza oruzaaro rwa Ruhanga nk'oku na Kaini yaitsire Abeeli. Tihariho kutiina Ruhanga omu maisho gaabo.

Kwonka Ruhanga taburaho n'omwe aha bantu Be. Abarinda nangwa n'omu kufa, kandi akaraganisa ngu n'aha kiro ky'aha muheru Aryabazooro.

OKUHENDERA

“Orikusingura Ndyamwikiriza kurya aha Muti Gw'Amagara, Oguri omuri paradiiso ya Ruhanga.” Ka n'ekiteekateeko ekirikureeta amashemererwa. Ogwo Muti Gw'Amagara omu Kibanja kya Edeni ogwabaire gutarikubaasa kwirirwa haihi ahabw'okugwa kwa Adamu hati guhairwe ogwo orikusingura. Egyo rurara erikumurinkana eya kerubi omurinzira eteirwe omu kyobati. Kwonka terateirwe omu kyobati etakabandize yaashwekwa n'eshagama y'Omwana gw'Entaama. Ka tuteekateekye ahari aga mazima akaanya kakye turikwebuuza ahabw'enki Omuti ogu gwaimirwe Adamu kandi n'oruzaaro rwe kwonka hati gugarukire gukaikirizibwa.

Ekigyendererwa kya Ruhanga aha kihangirwe Kye, omuntu, n'okumumanyisa ebigambo Bye. Omu kitabo ky'Okutandika, Adamu akaheebwa Ekigambo kuba nikyo kyamubaisaho. Amagara agabaisiibweho Ekigambo nigaba gari Ekigambo kyorekirwe. Ago n'amazima tikwo kiri? Kwonka Adamu akabaisibwaho ekyo Kigambo? Ngaaha, ahabw'okuba akaba ari ow'okubaisibwaho Ekigambo KYONA, kwonka akaremwa kuta omutima aha Kigambo kyona. Bwanyima haimuka Musa. Ka yaabaire ari omushaija mukuru w'amaani. Beitu nawe akaremwa kubaisibwaho Ekigambo kyona, kandi nabi ogu, orikushushanibwa na Nabi Mukuru owaabaire naija, akaremwa kworohera Ekigambo ahabw'ekiniga. Hakaba hariyo na Daudi, omugabe mukuru wa Israeli, omuntu ori nk'oku omutima gwa Ruhanga gurikwenda. Akagwa ahabw'obushambani, obu yaayohibwa. Kwonka aha muheru, omu kuhikiirira kw'obwire, hakaija Omwe, Omutwe, niwe Yesu, nawe Owaabaire naateekwa kwohibwa kureeba yaaba yaabaire naija kubaisibwaho Ekigambo KYONA ekyabaire nikiruga omu kanwa ka Ruhanga. Obwo nibwo enteekateeka za Sitaane zaafaafatikana. Ahakuba hanu hakaba hariho Ogwo Owaabaire naabaisibwaho na “Kikahandiikwa,” kandi Ogwo Orikukirayo oburungi omu bi Ruhanga yaakozire akasingura ahabw'okworeka Ekigambo kya Ruhanga.

Obwo nibwo Ogwo owaayorekirwe Ahikiriire yaaheebwayo aha musharaba, nk'Omwana gw'Entaama wa Ruhanga Ohikiriire ahabw'ekitambo ekihikiriire. Kandi ahari ogwo “muti” Akatunga obuhuta Obwamwitsire, kugira ngu itwe, kurabira Omuriwe kandi n'Ahabwe, tubaase kurya aha Muti Gw'Amagara, reero ago Magara agaheereirwe busha gajje kutubaasiisa kusingura, tutyo tworekwe Ekigambo kya Ruhanga.

Kandi hati ahari aba Baana ba Ruhanga, abarikusingura Ahabwe, bahairwe omugisha gwa paradiiso ya Ruhanga, n'okuguma nibakwatanisa na Yesu Kristo. Tiharigaruka kubaho kutaana Nawe bundi. Ahu Arikuzo, omugore We niho arikuza. Ebye, Abibagana n'abakundwa Be aha buzaare bw'okuhungura Nawe. Ebintu by'omu mubonano biryashuuruurwa. Ebintu by'omwirima biryamanywa bwerure. Turyamanya nk'oku turikumanywa. Turyashushana Nawe. Obu n'obuhunguzi bw'omusinguzi osingwire ahabw'eshagama y'Omwana gw'Entaama n'Ekigambo ky'obujurizi bwa Yesu Kristo.

Ka twine ekihika ky'okuhika aha kiro ekyo obu emihanda etegami yoona erigororoka, kandi turyaguma Nawe, ebiro byona. K'ekiro ekyo kirahukye kwija, naitwe turahukye kworohera Ekigambo Kye reero omu buryo obwo tuhamye okushemera kwaitu aha kubagana ekitiinisa Kye.

“Oine amatu, ahurire eki Omwoyo arikugambira amakanisa.” Ka n'eky'enaku kushanga ngu obusingye obu obw'okubanza tiburahurikiize Omwoyo. Omu mwanya gw'Omwoyo bukahirikiza omuntu. Kwonka Ruhanga asiimwe, omu busingye obw'aha muheru nihaza kwimuka ekibiina, Omugore w'Amazima ow'omu biro by'aha muheru, kandi naija kuhurikiza Omwoyo. Omuri ebyo biro by'omwirima ndindindi omushana guryagaruka ahabw'Ekigambo ekishemeire kandi nitwija kugaruka omu maani ga Pentekoote kutangirira okugaruka kwa Mukama Yesu Kristo.



www.messagehub.info

Obutumwa obu bukabuuirwa
William Marrion Branham
 “... omu biro by'eiraka ...” Kush 10:7